

ወዘር ካርጅየት አሰይድ ዑሰማን ሳልሕ ልእከት ርኢስ ኢሰያስ አብጽሐ



ወዘር ካርጅየት አሰይድ ዑሰማን ሳልሕ የም 9 ማርች ሐቀ አዘዘር ልእከት ርኢስ ኢሰያስ አብጽሐ

ሰውድሃ አሚር መሐመድ ቢን ሰልማን አብጽሐ።

ለልእከት የም 9 ማርች ዲብ ርድድ ወዘር ካርጅየት አሚር ፈይሰል ቢን ፈርሳን ቢን ዐብደላ ትክበተየ። እምበል እሊ ወዘር ዑሰማን ወወዘር ፈይሰል ዲብ ናይ ክልኤ ለጅሀት፣ መንጠቀት ወእድንዩ ለረሀዝ ቀድታት ህድገው።

እቲ ልቃእ እብ ጀሀት ኤረትርዩ መስኡለት ሸኡን ትንፈዝየት ሰፋረት ኤረትርዩ አሰይደ ወይኒ ገረዝዝሄር፣ እብ ጀሀት ሰውድሃ ህይ ናይብ ወዘር ካርጅየት መሀንድስ ወሊድ ቢን ዐብዱልከሪም አልኹረይጂ ለብእቶም ሰብ መዝ ውዛረት ካርጅየት ሓድራም ዐለው።

ፈሬዕ መሕበር ወጠን አዋልድ አንሳት እዳረት አቅሊም ምግብ፣ ሰዋገት መኪነት ለአድረሰዩን አንፋሩ አድሐረ

ፈሬዕ መሕበር ወጠን አዋልድ አንሳት እዳረት አቅሊም ምግብ፣ ምን ወሬሕ ጁን ናይ ሰነት 2024 አሰክ ወሬሕ ፌብረዋሪ ናይ ሰነት 2025፣ ሰዋገት መኪነት ለአድረሰዩን አንፋሩ እት የም 6 ማርች አድሐረ።

ለድሩስ እብ ጅንሱ ናይ ሰልፍ

ክምቱ ለሐበረት መስኡለት ፈሬዕ አሰይደ ናዝሬት በይን፣ ዲብል መጽእ ለፈግር በራምጅ መዓወነት ኩሎም ጀሃት እግል ኢትትፈንቴ ምነን ትፋኔት።

ምዲር ዓም ቅሰም እዳረት ወማልየት አሰይድ ተወልዱ ቀለታ እብ ጀሀት፣ እብ ውቁል እስትሸሃድ

ለትበጽሐት ደረጃት፣ እብ መትሰግል ዲብል ትትሐዜ መርሐለት እግል ትትዐዴ ዶር ሸባብ እግል ልትወቀል ትፋኔ።

እት ደንገብ፣ እግል ደረሰ ወዲብለ በርናምጅ ዶርም ለአግደው ጀሃት ወረቀት ሸሃደት ዲብ ትትሀየብ፣ ታእጊክ ወዶር አዋልድ አንሳት ለለአርኤ ዕፌ ፈን ትቀደመ።

እሊ ክእን ዲብ እንቴ፣ መሕበር ወጠን አዋልድ አንሳት አቅሊም ምግብ ምስል መሕበር ሐካይም ኤረትርዩ እብ መትዓዋን፣ ዲብ ሰረማን ሰጋድ-ርሕም ለረከዘ መሓደራት እግል አንፋሩ ዝመ።

እዳረት ምዴርየት አኽርየ ህይ፣ እብ መናሰበት 8 ማርሱ፣ እድንያይት አምዕል አዋልድ አንሳት እግል ምስኩናም ደረሰ አትፋገዐት ወሰዳይት አላት ነዳፈት ወዳት።



ሰሊ የወንጌል ምግብ

ጀድወል እምትሓን ካልእ ደረጃት ፈግረ

እምትሓን ሸሃደት ካልኣይት ደረጃት በሀለት 'ማትሪክ'፣ ምን የም17 አሰክ 23 ማርች እግል ልትሀየብ ክምቱ፣ ዲብ መአሰሳት ተዐሊም ውቁል ወብሐሰ ሙዲረት መርከዝ እምትሓናት ወንጌም ዶ/ረት ብስራት ገብሩ ሐበረት።

ምስል ኤሪን እቲ ወዴተ መቃበለት ዶ/ረት ብስራት እት 12 መጃል ተዕሊም ለልትሀየብ ናይ የም ዓመት እምትሓን፣ ዲብ ክለ ወጠን ወእት ርድድ ወጅደ ሰውድሃ እብ ዓመት ዲብ 16 ንቅጠት እግል ልትሀየብ ክምቱ

ሸርሐት።

ዓም ብዝሐለ ለአምትሕኖ 24,306 ክምቱ፣ እሊ ዕልብ እሊ ምነ ሐልፈት ሰነት እብ 10.6 ምእታይት ክም ወሰከ እንዴ ሐበረት፣ ለ50 ምእታይት አዋልድ አንሳት ክም ተን አትአመረት።

ምነ እቲ እምትሓን ለሻርኮ 84.1 ምእታይት ዲብ መድረሰት ዋርሳይ ይካእሉ- ሳወ ተዐሊም አክዳሚ እብ ገበይ ንዝምት ደረሰ ለጸንሐው ወደረሰ መዳርስ ፈንየት ክምቶም ለሐበረት ዶ/ረት ብስራት 3,861 ካልእ ዶል ለለአምትሕኖ

ክም ህለውመ ወድሐት።

እምበል እሊ፣ ዲብ ከደማት ሰጅን ወተኣዲብ ለህለው 61 ናይ ቃኑን ሰጂኒን ወዲብ አፍዐበት፣ ዐሪታይ ወሐጋት በራምጅ ምህሮ እግል ዐባዩ ታብዐ ለጸንሐዩ አዋልድ አንሳት ክም ሻርኮ አትአመረት።

እት ደንገብ ዶ/ረት ብስራት ዲብ ወክድ እምትሓን ወቅት ካፊ ሰበት ልትሀየብ መሻርከት ወቅቶም እብ ዋጅብ እግል ልትነፍዶ እቡ ወርሐም እንዴ ደምነው እግል ልሸቀው አትፋቀደት።

ውዛረት ማልየት ወዐማር ወጠን ምስል ባንክት ዐማር አፍሪቀ፣ እትፋቅያት ፈርመት



ሰሊ ኣብርሃም በየን

እት ሸቅል ለህሌት ወራት እግል ትደቀብ ወመቅደረት ጣቀት ወጠንየት እግል ትትረሸድ፣ ውዛረት ማልየት ወዐማር ወጠን ወባንክት ዐማር አፍሪቀ፣ እት የም 10 ማርች ዲብ እንክር ምውዳቅ ጸሓይ ዐድነ መርከዝ ጣቀት ሐዲስ እግል ልትወተድ ለትገብእ ናይ 20 ሚልዮን ዶላር እትፋቅየት ፈረመየ።

ዲብ እት አሰመረ ለገብአት ዓደት ወዘር ማልየት ወዐማር ወጠን ዶ/ር ጊዮርጊስ ተኽለሚካኤል፣ ተሐድያት አፍሪቀ እብ አፍሪቅዩን ሐል እግል ልርከብ ክም ቀድር እንዴ ሸርሐ፣ መባደረት ባንክት ዐማር አፍሪቀ ሐቆ ሐመድ፣ ሕኩመት ኤረትርዩ ምስል ባንክት ዐማር አፍሪቀ እንዴ ትዓወነት አትብግስቴ ለህሌት በራምጃት እብ ዋጅብ ልሰርገል ክም ህለ ኣብርሀ።

ኤረትርዩ ክም ዲብ ክሉ መጃላት፣ እት መጃል ጣቀትመ መቅደረት ተአርኤ ወተዓቤ ክም ህሌት ለሸርሐ ዶ/ር ጊዮርጊስ፣ እትሊ

ጽቡጥ ለህለ በራምጅመ፣ መአሰሳት ወጠን መቅደረትን ዲብ በንዩ እብ ሜርሒት ክም ሻርኮ ሸርሐ።

ኤረትርዩ ወባንክት ዐማር አፍሪቀ ዲብ ደቀምሐሬ ምስል ምግባይት መሐጠት ጣቀት ሕርጊን ለልትሓበር እብ ጣቀት ጸሓይ ለሸቆ መርከዝ እግል ልትወተድ ክም አተፈቀየ ልትዘከር። ለዲብ ሸቅል ለህለ መሸርዕ እት ሰነት 2026 እግል ልትመም መስኡት ህለ።

ኤረትርዩ ወባንክት ዐማር አፍሪቀ፣ እትሊ ወክድ እሊ፣ ዲብ 12 አካን ክል ምነን ከናይ 30 ሚጋ-ዋት ንቃዋ ጣቀት እግል ትወተድ በራምጅ እንዴ ኤተነዩ ሸቆ ክም ህለየ ልትእመር።

እሊ እብ ሰነት አሰክ 360 ሚጋ-ዋት እግል ለህብ ለቀድር ለትበገሰ በራምጅ፣ እብ ምልሃዩ መሐዝዝ ጣቀት እግል ለአርሄ ወዲብ በራምጃት ዐማር ገጽ ቀደም እግል ልሄርር ዶር እግል ለህሌ እግሉ ቱ።

ከበር እስትሸሃድ

ገዲም ሙናድል ሚጀር ሃብቶም በርሄ ገብረህይወት፣ ዲብ የም 8 ማርች ዲብ 68 ሰነት ዕምሩ እብ ሕማም አስተሸህደ።

እት ሰነት 1973 ዲብ ጅብህት ተሕሪር ኤረትርዩ ለአልተሐቀ፣ ዲብ ሰነት 1975 ዲብ ቅዋት ሸዑብዩ ተሕሪር ኤረትርዩ ለትሓበረ ሙናድል ሃብቶም፣ ዲብ ግድለ ሰላሕ እት ዲሸ ቅታል ወቅሰም እዕላም፣ ሐቆ ሕርየት ህይ ዲብ ቅሰም ጀዋዛት ወጅንሲያት መስኡል አቅሊም ወሀይኣት/ስታፍ እንዴ ገብኡ፣ ሸዐቡ ወወጠኑ እብ መትሰግል ለክድመ ምሕርባይ ቱ።

ገዲም ሙናድል ሚጀር ሃብቶም በርሄ በዐል ፈረዕ ወ4 ዋልድ ቱ።

ዓደት ቀብሩ ህይ የም 10 ማርች ሰር አምዕል ዲብ መቅበረት ሹሀደ አሰመረ ገብአት።



ቅሰም ጀዋዛት ወጅንሲያት እብ እስትሸሃድ ገዲም ነፈሩ ሚጀር ሃብቶም በርሄ ሐዘኑ ዲብ ሸርሕ፣ እግል ዐይለቱ፣ ናይ ግድለ መልህያሙ ወመሻቂቱ “ኤማን ወሰብር ለሀበክም” ልብል።

ሕርየት አንሳት ጽግኤ ዐማር

ሕሽመት ሰማን ማርስ እድንያይት አምዕል አ/ አንሳት 2025 እት ዐድ ወካርጅ



8 ማርስ - እድንያይት አምዕል አዋልድ አንሳት፡ “ሕርየት አዋልድ አንሳት እግል ዐማር” እት ሐንቴለ ትብል ሰቅራት፡ ዮም 8 ማርስ እብ ደረጃት ወጠን ዲብ አስመረ ሐ’ረት ኤክስፖ ትዝከረት።

ዲብለ ውቁላም ሰብ-ሰልጠት ሕኩመት ወጀብህት ለሐድረው ዲብ መናሰበት ለትቀደመት ከሊመት መሕበር፡ ናይ ዮም ዓመት 8 ማርስ፡ ምስል ሐላት አቅሊም ወእዲነ ለትጸበጠ ቅሎፅ ጸብኢት እብ ውቅል ወጠንያይ ፈዛዐት ወመጋብህት እንዴ አድዐናነ እት አሳሲ በራምጅ ዐማር ቀሊል ለኢገብኦ መትቀዳም አርኢኑ ኩዲብ ምዕራፍ-ሐዳስ ንትዐዴ ዲብለ ሀሌነ ዲብ መርሐለት ትትዐየድ ሰበት ሀሌት ፍንቲት ክም ወደየ ተሐበረ።

ዲብ ዐግሎ ተዕሊም ክሉቅ ለህለ ሰወ አብካት፡ መሻረከት አንሳት ዲብ ኩሉ ደረጃት ምስል ናይ ውላድ ተብዕን ዲብ ልትመሳዌ ምጽኡቲ፡ ባርህት ሩእየት ኤረትርያት ለለክርኤ ክምቲ፡ ዲብ አስረቶት ለመድ ሙእዚ ስጅልት ለሌት ዐውቲ ህይ አዋልድ አንሳት ኤረትርየ እብ ፈዛዐተን ወውቅል መሻረከተን ለአከደያሁ ሕቁቅ ቃትኒ ክምቲ በርህ።

ለዲድ፡ ዶር ኤረትርያት ዲብ ለትፈናተ መራሕል ንዳል እበ ለለክርኤ ዕፌ ፈን ዲብ ልትዝር፡ እግል ምናድሊን ምሕርበት ሀድየት ተሀየበት።

እሊ ክእነ ዲብ እንቲ፡ አዋልድ አንሳት ሰካን 13 ምዴርየት መዲነት

አስመረ፡ እብ መናሰበት 8 ማርስ፡ እት ዮም 5 ወ 6 ማርስ 163 ኪሰ ደም ትበርዐየ።

ቀደመ-መ ውዛረት ሐርስ፡ እት ዮም 06 ማርስ እድንያይት አምዕል አንሳት ዲብ አስመረ ዐየደት።

ወዚር አረፋይኔ በርኤ፡ ለውዛረት እግል ሰልፍ መረት ሰማን ማርስ እብለ ደረጃት ተዐይደ ክም ሀሌት ሐቀለ ሀድገ፡ “ሕርየት አዋልድ አንሳት እግል ዐማር!” ለትብል ሰቅራት ህይ ዱቅሪ ምስል ልእከት ውዛረት ሐርስ ለትገይስ ክምተ ሸርሐ።

ሕርየት አንሳት እብ ኩሉ ጃንብ እግል ትትኣከድ ሐቀ ገብኦ፡ ሰባተት ወውሕደት አዋልድ አንስ ክም ለአትሐዜ ለሐበረ ወዚር አረፋይ፡ ኩሉን አንፋርለ ውዛረት መትዝመን ዲብ መሕበር ወጠን አዋልድ አንሳት እግል ለአ’ተርደ ተሐሰበ።

ዲብ ፈሬዕ መ.አ.ኤ. አቅሊም ምግብ መስኡለት ሰያሱት ወመትዝም አሰይደ ኤልሰ ወልዴጋብር እብ ጀህተ፡ መሳዋት እብ ደም ቃሊ ለተኣከደት ክምተ እንዴ ሐበረት፡ ሻባት ዲብለ ውዛረት ለትከሰተ እግለን አብካት እንዴ ትንፍዐየ በቃዐተን እብ ፍዕል እግል ለአርእየ ትፋኔት።

መስኡለትለ መሕበር እት ውዛረት ሐርስ ሻበት ሄራን ዮሴፍ እብ ጀህተ፡ ውዛረተ ለአትዳሌቲ መጽንሐ አጀኒት፡ እማት እት ሸቅለን መፍርየት እግል ልግብኦ ዶር ዐቢ ክምቡ አፍሀመት።

እብ ደረጃት አቅሊም ጋሽ በርከ ለአምዕል፡ እት ዮም 5 ማርስ፡ እብ አሰራር አዋልድ አንሳት አንፋር ቅዋት ድፋዕ፡ ደረሰ ወሽዐብ፡ ክምሰልሁመ ለትፈናተ ዕፌ ፈን እብ እንዴ ገምለት ዲብ ጎጂ ተዐየደት።

መስኡለት መሕበር እት አቅሊም አሰይደ ይሕደጋ የውሃንስ እትለ አስመዐተ ከሊመት፡ ዮም ዓመት ዲብ መርሐለት ዐማር ወመጋብህት ሐዳስ ዲብለ ተዐዴነ ዲብ ወቅት ትትዐየድ ሰበት ሀሌት ፍንቲት ክምበ ሸርሐት። ኩሉ በራምጅ ዐማር ወመጃላት መሕበራይ እቅትሳድ፡ እብ መሻረከተን ውቅል ፍገሪት ሰኔት ለአመጽኦ ክም ህለ ህይ ወደሐት።

መስኡለን አፍርዐት ወጠንያይት ኮንፈደራልየት ሸቃለ ወመሕበር ወጠን ሸባብ ወደረሰ ኤረትርየ ዲብለ አስመዐወ ከሊመት ተእዩድ፡ ቀድየት አንሳት ናይ መኣሰሳት ፍንቲይ ሰበት ኢኮን፡ ኩሉም ጀሃት ሕኩመት እብ ዓመት አዋልድ አንሳት ህይ እብ ፍንቲይ እብ ፍዕል ምስዳር እግል ልንሰኦ ተሐሰበው።

ሐክም አቅሊም ጋሽ-በርከ ሰፊር መሕሙድ ዐሊ ሕሩይ ህይ፡ ዲብ 2024 ዲብ ባረንቶ 804 አዋልድ አንሳት አርድ ሰከን ክም ተሀየበየ፡ ዝያድ 2,800 አዋልድ አንሳት ሚልከት ወሸቃለ ሐርስ ከረም ወ መሰየ እግል ልግብኦ ክም ቀድረየ፡ እሊ ህይ፡ መሻረከተን ዲብ ኩሉ መጃል እግል ትትወቀል ለገብኦ ጅህድ ክምቲ እንዴ አሸረ፡ ምን እሊ ወለዐል እግል ልትቀደም ጅህድ ትሩድ ወክሰኦት-ማል ክም ለአትሐዜ አፍሀመ።

እብ ደረጃት አቅሊም ቅብለት በሐር ቅየሕ ህይ፡ ዲብ ስታድዩም ባጼዕ ተዐየደት። እበ መናሰበት፡ ኬወ ነዳፊት ዲብ መቅበረት ሹሀደ፡ ጅግረ አምር ዓም ወበራምጅ ፈን ገብኦ።

መስኡለት መሕበር ናይለ አቅሊም አሰይደ ጅምዐ ማሕሙድ ራከ፡ ዲብ ሐልፈ መራሕል ዲብ መጃላት ዐማር ወመዳፍዐት ለትሰጀለ ሄራር ዶር አንሳት ለትርኦ እቲ ክም ቲ እንዴ ሐበረት፡ ዲብ ዐውቲለ ኢቲን ለሀለበራምጅ ወጠን እበ ትወቀለት ክም ሻርከ ዳምነት ክምተ ሸርሐት።

ሙዲር ምዴርየት ባጼዕ አሰይድ ሀይሌ አሰፍሀ፡ አንሳት ኤረትርየ ምን መደት ቅድም እንዴ አምበተየ እግል መንገፎ ዳረን፡ ፡ አምጽኦት ሕርየት ወሕፍዘት ሰያድት ወመዳፍዐት ዶረን ዐቢ ክም ዐለ ወኣዜመ ዲብ ልትደቀብ መጽኦ ክም ህለ አፍሀመ።

ኣክመት አ/ቅ በሐር ቀየሕ አሰይደ አስመረት አብርሀ፡ ለአምዕል እግል ትግመል እት ገብኦት ጅግረ አምር ዓም ለትዐውተየ ደረሰ ጀዋኣዝ ማል ሀበተን።

ልእከት መሕበር ወጠን አዋልድ አንሳት ኤረትርየ እብ መናሰበት ሰማን ማርስ - እድንያይት አምዕል አዋልድ አንሳት

ሰማን ማርስ እድንያይት አምዕል አዋልድ አንሳት፡ “ሕርየት አንሳት እግል ዐማር!” እበ ትብል ሰቅራት ክምለ እት ዲመ እት ቀበት ዐድ ወካርጅ እብ ሕሽመት ዛይደት ትትዐየድ ሀሌት።

ናይ ዮም ዓመት ሰማን ማርስ ምስል ተዋልል መንጠቀትን ወእድንዳ እንዴ ትጸበጠ እት መንሸገልን መደት ረያም ለትጸዕነ የም አለቡ ተሐድያት ወጸብኢት ባይን፡ እብ ውቅል ወጠንያይት ፈዛዐት፡ ወክፈሕ እንዴ አጅገር፡ መዋ-መጥሩ አሳስ ዐማር እት አዋፍሐት ሰኔ እንዴ ሄረር፡ እት ምዕራፍ ሐዳስ ወፍንቲት ለትዕየተ ንትዐዴ እት ለሀሌነ ዲብ መርሐለት ትትዐየድ ሀሌት። ልእከት እለ ምዕራፍ ሐዳስ፡ እብ ንዳልን ለመደድናህን ሰላም ወመስኩበት፡ ሰኔ እንዴ አደቀብናህን፡ እትሊ አሳስ ዐማር እሊ እንዴ አተንከብኩ፡ አስክ ለሌሰት ወለትጠወረት መርሐለት ዐማር ወዐቦት አለምባይ ቲ። ለዲብለ ሐልፈ መራሕል መስተንክር ለሸቄት ሐሊት ወስሙድ ሸዐብነ፡ ክትፈቲ ላተ፡ በዐል ሐዘት ዐባይ አንሳይት ኤረትርየ ህይ፡ ዮምመ ክምለ እት ማሌህ፡ እት ዐውቲለ ተሌ ወጠንያይ በራምጅ ዋክተ ዛይደት ወኣካነ ዐባይተ።

ዛይደት መሻረከት አንሳት ኤረትርየ እት ንዳል ጀለ ሕርየት ልግበኦ ወእት እስትቅላል፡ ደሚን ሰላም፡ ሰያድት ወዐማር ክምተ፡ እንዴ ትደጋገመ እብ ዐመል ትረኦ። እሊ በያን እብ ዐመል ላቲ መትሰባል ኤረትርያት ህይ፡ ተፍኪር መዋዋኒን ምን ቅርዱ እንዴ በደሉ፡ ሸዐብ ኤረትርየ ዲብ መስኦለት መሳዋት ጅንሰ፡ ፈሀም ዋወር እግል ለአዳብር አተቅደረ። አንሳት ኤረትርየ ላኪን መሻርከት ሌጠ እንዴ ኢገበኦ፡ ሰወ መስለሐት ለረክባመ እግል ልግበኦ ብኢተን። እሊ ሀደፍ ዐቢ እሊመ እብ ጅድየት እት ልትሸቁ ዲብ ጸንሐ ወሀለ። እበ ትከለቀ በክት ህይ፡ መንበር ኤረትርያት እብ ኩዕየት እት ትበደል ወትሰኔ ትመጽኦ ሀሌት።

ምነ ብዙሕ ተቅዩር መንበር፡ እብ ባይን ለልትረኤ፡ መሻረከት አንሳት እት መጃል ተዕሊም ቲ። ዲብ ተዕሊም ክሉቅ እብለ ህለ ሰወ አብካት፡ መሻረከት አንሳት ዲብ ክሉ ደረጃት ተዕሊም፡ አስክ ዲብ ኩልያትመ፡ ምስል ውላድ ተብዕን እት ትትሳዌ ምጽኡቲ፡ ባርህ መ-ሰተቅበል ኤረትርያት አንሳት ለልክርኤ ቲ።

መሻረከት ሻባት አንሳት እት ለትፈናተ ምህናት፡ እት ክምሰልሁመ ውላድ ተብዕን ሌጠ ብሕታሙ እት ለዐለው አሸቃልመ ተቅዩር ርኡይ ማጽኦ ሀለ። እት አንሳት ለአተጀህ ክዳማት ዓፍየትመ፡ እት አድመኖት ዓፍየት አንሳት ወአውሐዶት ሞት ወላድያት እት ወክድ ወሊድ፡ ተቅዩር ዐቢ ሰጃል ሀለ። ክም ክሸቦ፡ ህዳይ ንኢሽ ውብዕድ ለመስል ዴራይ ዐዋዲ እብ ቃትን መትመንቶቲ ህይ፡ ሐድ ምነ አዋልድ አንሳት ኤረትርየ ለአከደያሁ ሕቁቅ ቲ። ክም ፍገሪት እሊ ሰርገል፡ አንሳት ኤረትርየ ሕግላን እግል ለአስርተ ወዐቦት እቅትሳድ እግል ለአክደ እት ገብኦ ለህለ በራምጅ ዐማር፡ መሻረከተን እብ ኩዕየተ ምን ገብኦ ወዐደደ እት ርሸመት እት ተዐርግ ተሄርር ሀሌት።

መሳዋት ጅንሰ ዎር ምን መቀየሲ ሰልጠት መጅተመዕ ቲ። ለሐሰ ሰያሲያይ ፍክር እግል ልብጽሐ ለወጥን ናይ ደንጎበ ሀደፍ ምን ለሀሌ፡ እምበል ፈናታይ ጅንሰ፡ መሕበራይት አካን ወፍንቲት ብዕደት፡ እግል ክሉ ነፈር መጅተመዕ ለትሳወ አብካት አከዶት ቲ። አከዶት ለትሳወ አብካት እብ እንክሩ፡ መዋልያይ ብነኦ ወተጠውር መጅተመዕ ቲ። እብ መጅብ እሊ ልትረኤ እት ህለ በገ፡ ሕርየት አዋልድ አንሳት ለዐበ ሀደፈ ዐማር ወዐቦት መጅተመዕ እብ ግዲዱ አከዶት ቲ።

ሸዐብ ኤረትርየ ዲብ ቀድየት አከዶት ሐቅ ወመሳዋት አዋልድ አንሳት ለአርኦየ መትቀዳም፡ ለጠወረዩ መርበይ ወፈሀም ራቴዕ፡ ዎር ምነ ንትሐበን እቡ ተእሪክ ቲ። ተእሪክነ፡ ተኣምርተ ወጠኒያይ ቅየምነ ወአግደ ፍገሪት ሰቡል ንዳል ወእስትሸሃድ አንሳትና ቲ። እሊ መትቀዳም እሊ፡ ገያደት እንዴ ወሰከ፡ ሕርየት አንሳት እብ ከማል እግል ትትኣከድ ህይ፡ ክሉ ጃሃት ሕኩመት፡ ወክልነ አንፋር መጅተመዕ እብ ክለ ሐሊትን እግል ነኦተላልዩ ወንራዕዩ ምህም ቲ። እግል ፍገሪት ሐይሰት ህይ፡ ዲብ ክሉ መጃላት ለትሳወ አብካት እንዴ ፈይሐ፡ ምህነት ወመቅደረት እቅትሳድ አዋልድ አንሳት ለልትወቀል እቡ በራምጅ እት መግል አውዐሎት፡ ደቅብ መጅተመዕ ዲብ ሻምለት ዐቦት እቅትሳድ እንዴ ሰርገልነ፡ ክም ደውለት ወመጅተመዕ ለነኣደሚዕ እቡ አስሉል እግል ነኦተላል፡ ዐቦት ክብ እግል ነኦብል፡ እብ መናሰበት እለ ቃልየት አምዕል 8 ማርስ ገለድነ እግል ንጀድድ መሕበር ወጠን አዋልድ አንሳት ኤረትርየ ልትሳኪ።

ዝክር ዳይም እግል ሸህዳነ!
ዕምር ዋወል እግል 8 ማርስ እድንያይት አምዕል አዋልድ አንሳት!!
መሕበር ወጠን አዋልድ አንሳት ኤረትርየ
ዐውቲ እግል ዝል!

ኤረትርየ @ ሸዳሽ

ክል አርቡዕ ለትጠ’በዕ ጀሪደት

መዳልያይ፡-
- መሐመድ እድሪስ

ለይኣውት ወኣርተየት
* ዘህረ ዐሊ
* ፋዋን ኣድም

ተለፎን፡ 121797/07121322
ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡163471-07588045

አትኣመርት፡
ተለፎን፡125013፡ ዕ.ሰ.ቡ፡ 1284

7^ይ ክፈል

ምን ስራል ወስርሐል፤ ጅጅጁንቱ ሐቱ ዶል

ለትሰምዐት ወትርኤት ፍንቲት ሐረከት አባይ ወለ ለሚም አቅሰውታትመ ልግበኔ መድፈዐጃየ ወለ ቃደትለ ጅብሀት (ድፈዕ) እት እዝኖም ምስልተ ለትቀጥር። ቃእድ አማውር እግል ለሓልፍ ወልትከበት። ወምድፈዐጃ ረድ መባሸር (ድቅሪ) እግል ልብለሰ። እግል ልሕጸቦ ወልትሐጸቦ እብ ተረት ተረት አነን ማይ ሌግ ትትአጀዝ እግሎም ምድፈዐጃየ። ሐኪምመ ብዙ እት ድፈዕ ምንመ ኢልውዕል ምስለ እግሩ ረፍዐ ሰበት ልትሐረክ አነ ወህቱ እተ እቱ ንትመዬ ድፍዐነ ተረፍነ አስክ ምውዓልን እንዴ ይእንገይሰ። አነ እባዬ አስእንዬ እት እገርዬ እት እንተ እት አከርር። ሓምድ ቀይሕ ክፋፋ እግል ለአትጋርም ሰፊ ብስክሊት አስተብደ። እሊ ሰድ እሊ አነ ሰኒ ሓርቅ ወንዱድ እት አኑ ክምእኒ እቤሉ። “ሓምድ፡ እሰልፍ ዓርፍ እኩ። ሐሬ እሊ እቱ ኑግ ትብል ለህሊክ ክፋፍ ምን እግል ልርአዩ እግልናቱ? ሕነ እግል ነአስትሸህድ ቱ ኢኮን ትብሉን ለህሊክም። ላመ አርወሐትክ ረቢ ልትሰአለክ ምነ ህታመ ክልቅት ተ ኢኮን” እብሉ ከምነ ክል ዶል በሊሱ እግል ይእስመዕ እበ እግለ ሻፍት ለዐልኮ ብላይ ትገላቡበኮ ምኑ።

ሓምድ ቀይሕ እበ ናይዬ ሓሩቀት እት ልትፈከር፤ እበ ሰላሳ ወክልኤ ለኢተመ ጀሃሪሁ ፈትሃት ሰሓቅ ሰኒ ግሩም ትሰሐቀ ወሐር “ወላሂ! ምነ እግልዬ ለአትፍክር ጋሪት ህሌት ምንዲ ገብኦ ክምሰል እሊ ናይክ ወናይ ብዕዳም ሰአላት ቱ። አዜ ዐሌክ አለህ! ምነ እቱ ትወለድክ ሞድይ አቡክ ወኡብዕብክ እግል ሚ እትለ እቱ ለህሊኑ መጽእክ? እግል ርሕክ ትሰኣል። እግል እስትሸሃድ ኢኮን ሐቆ ቴለኩ ሰኒ ምን በልሰ ሰአልክ ትዋቀን። ቶቤኩ፡ አነ አግል እብዱይ ይህሌክ ወእንሱ። እምበል ደግሽ ሕዱድ። ከሐቆ ሐረቅክ እት ወያኔ ሕረቅ ወብረድ። እብ መአማን ሐቆ እስትሸሃድ ህሉ። እት ግራክ ታሪክ ሰኒ ሐደግክ ወእብ ፍንቱይ ዌርሳይክ ምን ወርስ ጽዋርክ ሐር እግል ሊበል አለቡ።

ለአሰርካመ ኖሱ ልትሃጌ ወልውዕዝ እግልኩ። ወቀይክ ለደግም ኖሱ ለእግሉ ተአወርሰ ለህሊክ ክፋፍ ወሰለሕ ቱ። እሰልፍ ለልትህይብ ህለ ናይ ምን ክፋፍ ቱ? ልትበህል። ናይ ፍላን እንዴ ትበህለ ሐቆ ምን ክፋፋ ለሀርቦ ርኤካሆም ቀደም ሸሂድ ልትበህል ማይት ክምሰል ዐሉ። ወአዜ ለዐቤት ለእግለ ራክብ ለህለ ሰሚት ሸሂድ ሌጦ ክምሰልተ ትዋቀን? ቤሊኒ ክእግለ ፍትሃት አንያብ እብ ሰሐቅ አትባርሀየን እግልዬ።

አነ ደሚርዬ ሕዩር ምንመ ዐሉ። እብ “ተእሪክዬ ድገም ረቢ አምዕል ሀቤክ ምንገእ” ልብል ህለ እት እብል። እት ደሚርዬ ትሶረንት እግልዬ። ለፍርድ ላኪን እግል ክሊን ሐቱ ዐለ ለአምዕል ለህ እምበል ረቢ ለፍርድን እት እዲሁ ዐሉ። ዳሊሁ ዐለ አለቡ።

እብ ክእኒ ሓለት አወላይ ወራር ዌረት ግራሁ እንዴ ሀቤ። እት ካልኣይ ወራር በጽሐኩ። ሓለትን እግለ አንፋር ክድመት ወጠን እት ሕነ ለዐልነ ሸግን። ሐቆ አወላይ ወራር ተቅዩር ፍድብነ ወመትመካር እት ዐስከሪየት አርኤኩ። ሓለት ድፈዕመ ጼናህ ነሰኣኩ። አድሐ ዲደማን እት እንውዕል። ላሊመ ክምሰለ እግል ወቀይ ለትከለቀት ክል ምርተ እግል አተረዶት ድፈዕ ተሐት ወለዐል እት ዋርድየት ተአቀምቱ። እብ ፍንቱይ ጅብሀት ዛል አንበሰ እብ ከያል ለኢልትወሰፍ ንድቀት ድፈዕ እበ እንዴ ትብነ ክምሰል ኢልትነቀል ወኢልትረዴ ገብኤ። አባይ እተ እት እግሪ መክከል ወድዩ ለዐለ ትሉሉይ ህጅማት እት ጀበህት ዛል አንበሳመ እብ አሰልሐት ዐባዩ ሐሊቱ እግል አውደቀት ሰዋትር ቅዋት ድፈዕነ ጀረበዩ። እሊ እንዴ ወዴ ላኪን እብ ፈድለ ምን በርከ ለመጽእ ዐርኮካባይ ወለ ምን ከበሰ ለትከረ አግኑድ ቀላሚጦስ ንኢሸመ ምሽብሻብ እግል ልሸረፍ እቱ ቅድረት ወሐለት ራክብ የዐለ። እበ ልትረጀም እቱ ለዐለ ክቡድ አሰለሐት። ቴቤኮ “ትንፋሰ ለብእተ አርወሐት ኢትፈግር ምኑ” ልብል ለዐላመ ወኢትሐገለ።

ሸባብ ወሻባት ለእትሊ ድፈዕ እሊ ሻፋም ለዐለው፡ ቀዛይፍ አሰለሐት ክቡድ ክምሰል ዝላም እት ረአሶም እት ዘልም፡ ለእተ ጅብሀት ለዐለው ፍራሰ ላኪን ቡኖም እት ሰቱ እብ ሰሓቅ ወሀርጅ ወትርጀገት ለአትቃሙቱ ዐለው። ሓምድ ቀይሕመ አክለ ክርን ለክፍ መዳፍዕ አባይ ሰምዓተ ምራቁ እት ጀብብ፤ እግል ሞት ወቀትል እት ልትነሸግ ትርእዩ። እግለ ክምሰል ከላሸን ለትትርኤክ ብሬት ምስለ ግሩም መባትክ ገርቡ ወዛይደት ብዋረቱ ህዬ ዶል ማስሐ ወዶልመ ክምሰለ ክፋፋ እት ሰራግዩ ልትርኤ ዐለ። እግሉ እንዴ ትገንሕ ዐልክ ሐቆ እግል ብዕዳም አቅመትክ እግል ብዙሕ አሸዩኦ ልብ ትከሬ። ክሉ እብ ትዐብ ልግበኔ ወመሻገት ምኑ እንዴ ኢልትጸቦኑ ለአተው ለዐለው ወራር ዘማቱ ወጀብር እግል አፍሸሉቶም ለንዩት ሐቱመ ምንዲ ተዐሌ ለናይ ሓምድ (ቀይሕ) ላቱ በነ ክምሰል ተ ትትዋቀን።

እት ክፈል ዴሽ 32 ለዐለው ፍራሰ እት ዮም እንዴ ገብኢክ እግል ትውሰፎም ኢትቀድር። ለወቁል መዐነውዋቶም ልግብኦ ወብንዩት ገርቦም ሓምድ ሰኒድ ምርት ምኖም እት እንቱ ዐለ።

አክል አሕድ እት እዋን ካልኣይ ወራር ሓምድ (ቀይሕ) በዲር ሓሰቡ ለኢልአምር ቴልል እግሉ ሐሰቡ። ኮንድእ? አነ እግል ኖሼ እት ህጅኩ ልግበኔ ወእዩቱ ሃድግ እቡ ሳምዑ ለዩአምር ቴልል ህዳይ እቡ ፋጅኤኩ። ህዳይ ሰልፈይት መዐደዩት ሽንግልነ ወረፍዕ መስኡልየት እብ ግብኣቱ ሰኒ ትፈርሕ ቡ። ላኪን፡ ላኪን ለለአብለክ ጋር መትአርዳድ ህቱ ሰበት ዐላቱ። እዋን እማት ወሐዋት እት ለአትማሰዩ “መርዓዊ ሰኒ አምሴኩ

መርዓዊ ጊሱይ እት ሼኩ መርዓዊ ሰኒ አምሴክ!” ለልትበህል እቱ ለዐለ ወክድ ኢኮን። እብ ክሰሰ ህዳይ ሐቆለ ደግሞ ሰምዐኩሁ ሕልም መሰለ እቼ። አማን ትሐይሰ ኢፈርሐኮ እበ ለናዩ ፍክረት። ሰበቡ አዋልድን እግልክም ሰሚት ገብኤ። ወእግልነ መንገፍ” ልብል ሰበት ዐለየ “እሊ ሕጻን ላትርኤቱ ትትርኣዩ” እቤ! ከብጃ ከብጃ እት እንተ ትም ሐሬኩ። እሊ ወክድ እሊ እተ ጅብሀት ለሕነ ዐልነ እተ ልግበኔ ወእት ካልእ ድፈዕ እት ደጊገት ወሳንዩት ብዙሕ መትቃደር ልትርኤ እቱ ለዐለ ወቅት እብ ግብኣቱ ህዬ ዐድመ እንዴ ጌሰክ ህዳይ ወሕዳይ እግል ቲዴ ጋር ሰኒ ሰዱድቱ ለዐለ። እምበል ክርን መድፍዕ ወመንዱቅ፡ ክርን ዕላል ወሕላይ ለወሐደ እቱ ወቅት መክሩህ



ሸሂድ ሓምድ መሕሙድ ዑመር

ቱ ለዐለ። ሸባን ወዋልዴኖም ቀበሊት እብ ሰፈላል ወመትህጋን አድሕድ። ወእብ ሚ ትፈግር እትክ ወትጀሬ። ምነ ዓይር ለዐለ ምክሩ ለጠዐመት የዐለት ወለ ትረትዐት። አይወ! ሰድት እብ ሰድተ እዋን ማዋጅህት ወዐቂብ ሰዶደት ቱ ለዐለ። እስኢን ምን እግር እንዴ ኢትትሓረጥ ለትመዬት እቱ ወወዐለት እዋን ሰድተ!! ዕንታት ቀመት ስኩበ እንዴ ኢረክብ ምን ላሊ ወአምዕል እት ሳምዶታት ለትዐደ እተ ኪልም ኢኮን። እዝን ከበር ሰኒ እንዴ ኢትሰምዕ አውርሐት ለዐለበት እቱ ወቅት መክሩህ። ህጅክ ወሰሓቅ ላቱ ምን ዐግሎ ሸባባት እት ድፈዕመ ፍንቱያት ኢለአምረ።

ላመ መስኡሊን እበ ሓምድ ቀይሕ ቀደመዩ ጠለብ ብዙሕ እንዴ ኢልትረይሐ “ሐቆ ሓምድ ወዴ አፍዐበት ቤለየ” እንዴ ቤለው እት ሳምን ሐቱ ህዳዩ እንዴ ወደ እግል ልምጸእ እት ልሐብዩ አጀዘው እግሉ። ፋርስ ወሓጥር ክል ወክድ ምነ እግሉ ልታሌ ሕሽመት ወክብቱ ቱ ለረክብ። በሰ ለዐቤት ፈርህቶም ምነ ምልዐሌሆም ለዐለው መስኡሊን ሰኣል እግል ኢልምጽኦም ቱ ለዐለ።

ሓምድ ቀይሕ እግል ኖሱ እግለ እግሉ ለሐሰብ ለዐለ ህዳይ፡ ደሚሩ ሚ ልብሉ ክምሰል ዐለ ኮንዶእ እንዴ ኢኮን። እበ ሕነ መልሂቱ ለዐልነ ላቱ ወግምነ ክምእኒ ልብል ዐሉ። “በዲር ዋልዴኑ ህዳይ አቢ እቶም ሰበት ዐሉ። አዜ አርወሐቱ ጉርጉር ሰበት ቴሉ። ኩብድለ ዋልዴኑ እግል ለአብርድ ምን ሐዛቱ” እንብል ዐልነ ከነሐሜ። እሊ ህዬ ናይነ ወግምቱ እንዴ ኢኮን እተ ፈጅር እግልነ ወእግሉ ዓቅረተ ለዐለት ለእግለ አምራም ዐልነ ሐቱመ የዐለት።

ሓምድ መሕሙድ እግል ህዳይ ለጌሰ እቱ ወክድ ሰርየትነ (ሐይሊን) ምን ምክያም አስክ ልጋት ትቀየረት። አክል አሕድ ህዬ ምነ ብንቶለ (ክብሪ) ለአስክ ዐዲ ግራት ጋይሰ እንዴ አሰተብዴን ምስል አወላይ

በጽሐ እት ለሀናፍኦ መጽኦ ወእዴ ቅዋት ድፍዐናመ እት ገርብን ሰበት ለአምራህ እንዴ ኢትምሕከን እንብል ቤልሳይ መውዲታይ እት ተማሰ ድፋዓትን ልትሸመመ ዐለየ።

ሓምድ ላኪን ክምሰለ ወአቱ ዋልደት እግሉ ለህሌት ተዐካይ እት መስል። ለእግለ ፈቱ ብሬት እብ መጅሞዕ ወፈርድ አክለ “ልከፍ እበ” ትበህለያተ እብ አውታር እት ሰናቀየ እብ ፈርድ ወመጅሞዕ ፍንቱይ ለሐን ለአሰምዐን ዐለ። እብ ዐለት እግሉ ፍንቲት ቅድረት ሐርብ ወትክቲክ ዐስከሪየት። ምሴት ምሴት ህዬ ሰልአሰ ምድፈዐጃታት (ሓምድ ቀይሕ) ወአድም መሐመድ (ኪን ወዲ ናረ) ወጀከሚኖ አማይ አሹ (ወዲ ኩናመ) ምን ኪን ድፈዕ እንዴ ሐልፈው እተ እንዳ ማርያም ለትትበህል ለዐለት ንኢሽ ከንደግ ገንግኦ እበ ዐለው። አናመ ክምሰል ሐኪም ናይ ዕለታይ ዳይዬ ምስሉም ቱ ለዐለ። (አደይ ቅበጽኒ) እምዬ ጽበሪኒ። እለ ዶል እንደ ማርያም እንብለ ለዐልነ ወዶልመ አደይ ቅበጽኒ ተ። ለአሰሊ ሰሚተ ላኪን እብ ክሊን ለትትአመር (እምዬ ትጽበረኒ) እለ ለሓሪትተ። ለብዕድ አፍራደ ፈሰለትነ (ጋንታነ) እት ልትቃየር። ሕነ ላኪን ምምያይነ እምር ተ ለዐለት። አቤ! እምዬ ጽበሪኒ ተ ለዐለት።

ላመ ወቀት እንዴ ጋለብናሁ አምዕል ክምሰል ላሊ። ወላሊ ክምሰል አምዕል ንትነፍዕ እቡ ዐልነ። አድሐ በክት ትረከበ ምንገብኦ እንሰክብ እቱ። ወላሊ ላቱ ስኩበ እተ እበ ክልኤ ለደየትነ እትነ ሐራም ለለአበጽሕ ወእጅራም መስል እትነ ዐለ። ላመ አማን ህታተ!


ህተ ሰበት ገበኣት ህቶመ ኢለህድጎ እትነ ወኢልውዕዶ። ምን ገጽ አምዕል ህጅክክ ኢልትሰፍለሎ ወመሐበርነ ኢለሐዙ። ዳይነ ምን ገጽ ላሊ ቱ ለነአትጋይሱ ለዐለነ።

እብ ክምሰል እሊ ቴልል ሰሰ ወሬሕ ሐቆለ ሓለፍነ ህንዲዶ ካልኣይ ወራር እት ድፋዐት እግሪ ማእከል ጀብሀት ጸርነ እብ ክጅል ወደኒን ወያኔ ወመናቢቱ ሸመት ክጅል ወሐሳር እንዴ ትገልበበ እብ ፍራሰ ሓዩት ወላድ እለ መንባይት አርደት ጨበል ርንቦ ትብደለ። ለአምዕል ለሃተ ለፈታይ ሽነ ወአባይ ወመንባህ ቅብላት ክሉ እብ ክጃል እንዴ ኢፈቱ ልቡ ቃፍል እት እንቱ እት ሰክራት ሞት ኩሩይ እት እንቱ እት ብርክነ ሰላት ቀሰብ ትሰለ። አይወ! ቀሰብ ቱ ሚ እግል ልሊዴ ኖሱመ በዲሩ ኢኮን እንዴ ጤጠ ሸንክት ቅብለት ፈርድ ዘማቱ ነወ!

ልትረኣዩ ለዐለ ደረብ ጸሩ እንዴ ፋትሐ፡ ክምን ኢክሪቱ እግል ልርክብ ሸንሂቱ። ሕልሙ ሕልም አድሐ ዐለ እንዴ ኢሰክብ እብ ኢናዩ ትሐለመ ከእባቱ እት ምቀደም ክለ እዲነ ትፋድሐ። እግል ልፍረድ ወልሕከም እት ኢክርሲሁ ሺመት ተምነ። ለሺመት ለህ ሸመት እንዴ ትበደለት ጸንሐቱ። ሸመት እብ ሸመተ እንዴ መሸመሸት አመሸመሸቱ።

ሙሰውር፡ አቤል በረኸት

እት ለሐልፈ ወክድ አስክ ምዴርየት ሞልቂ እንዴ ተሐረክነ ሄራር ተዕሊም ምዴርየት ሞልቂ እግል ንድሉ፡ ምስል መምህር ህያቡ ጎይትኦም መስኡል ፈረዕ ተዕሊም ምዴርየት ሞልቂ ሃድጋም ዐልነ። ታምም ጽበጥ ዲበ እሊ ናይ ዮም ጥብባት እንቀድሙ እግልኩም ቅራኡት በኪተት።



መምህር ህያቡ ጎይትኦም

መአሰሳት ተዕሊም ምዴርየት ሞልቂ ሚ መስል ህለ?

እትለ ምዴርየትን እብ ዕሙማይ 24 መዳርስ ህለዩ። ክም ረውደት ለክድመ 2 ክም ረውደት ወመኣንብታይት ደረጀት 13 መኣንብታይት ወምግባይት ደረጀት ለከምክመ 7 ምን መኣንብታይት አስክ ካልኣይት ደረጀት ለትከምክም ህይ 1 ወምግባይ ወካልኣይ ደረጀት እንዴ ትከብተት ለተአደርስመ 1 ህሉት። ሐድ 298 ለገብኡ ሙደርስን ለአደርስ ዲበን ህለው። እለን መዳርስ እለን ዲብ ረውደት ልሰዕ መሻክል ምንመ ህለ 321 ግርዝ እንዴ ትከብተዩ ለልኣደርስ ህይ ዲብ መኣንብታይት 13,099 ዲብ ምግባይት ደረጀት 3,381 ዲብ ካልኣይ ደረጀት ህይ 1,015 ዐረዮት ምን 9-11 ሰነት ለዓማሮም ዲበ ለኣትሐዜ ዕምሮም ተዕሊም ለዩአንበተው ለንኣደርሶም ሰበት ህለው እግሎም እንዴ ወሰክ ዲብ እለ ሰነት እለ 18,431 ደረሳይ እንዴ ትከብተዩ ለአደርስ ህለዩ። ምስል ብዝሐ ደረሰ ህይ መሻክለት ናይ ሙደርስን ሳድፊ ህሉት።


መትመዳድ መዳርስ ዲብ እዳራት ደዋሒ ናይ እለ ምዴርየት ከኣፎ ህለ?

እለ ምዴርየት ጂኦግራፊያይ መካሪት ምድረ ኣድብር ወኣገልብቱ። ሰበት እለ መትመዳድ መዳርስ ምስል እለ መካሪት ኣርድ ልሰዕ ለኢትብጽሐ ዐዶታት ህለ እግልነ። ለህለ ዐዶታት 61 ምንማቱ አስክ እለ ምን ቅሩብ ከደማት ተዕሊም እግል ልርከበ ቃድራት ለህለዩ 21 ዐዶታት ሌጣተን። እብ ዕሙማይ ዶል ልትርኤ 65% አስክ እለ ከደማት ተዕሊም ለኢረክበ ደዋሒ ህለ እግልነ። እለ መሻክል እለ ሐል እግል ልግበእ እግሉ ምንመ ተሐሰበ ሰኒ ክቡድቱ። ሕነ እብ መቅደራት እግል ረይም ባካት ምን

1ይ-3ይ ፊስል እግል ንኣድርስ ምንመ እንጀርብ እብ ሰብብ ኢረከብ ሙደርስን መሻክል ህለ። ናይ ብክ መዳርስ መሻክለት ወኢገብኣኒ እግልሚ ላመ ህለዩ 24 መዳርስን እብ ካምል ዲብ ብክ ለልኣደርስ 11 ሌጣተን። ለተርፈዩ ዲብ ዳሳት ውበክ ተን ደረሰ ለልትከብተ። ሰበት እለ መድረሰት ኢትብኔት እንዴ ትበህለ ወኢተርፋኒ ወለ እብ ዳስ ክም ደርሶ ወገብኣ ዐለ። ለህለ መሻክል ላኪን ናይ ሙደርስን ኢረከብቱ። እለ ህይ ለዐበ መታክልነ ጋብእ ህለ። እለ መሻክል እለ አስክ ምን ለዐልነ ጃንብ ውዛረት ተዕሊም ወምስልነ ለህለው ጃንብ እዳረት ክልዶል ለንትሃኒ ዲብ ምንመቱ አስክ እለ ላኪን ሐል ራክብ ኢህላኒ። እግልሚ እብ ደረጀት ወጠን እንዴ ኢተርፍ መሻክል ሰበት ህለ። ዲበ ለሐልፈ ወክድ እብ ገበይ ውዛረት ተዕሊም ምስል ውዛረት ድፋዕ ብዕዳት ውዛራት ወመኣሰሳት ሕኩመት ተፋህም እንዴ ገብእ ለመጽአው ሙደርስን ዐለው እሎም፡ ገሌ ሐል ምንመ ኣምጽአው አሳሲ ሐል ላኪን አስክ እለ ርኩብ ኢህላኒ።

ገዩት ወፊህም ሽዑብ ህይ ከኣፎ ህለ?

እትለ ምዴርየትን ዲብ እለ ወክድ እለ ፊህም ወምራድ ሽዑብ ዝያድ ዐቢቱ ለህለ። እብ አሳሲ ህይ ለብዝሐ ደረሰ እንዴ ዘይድ ገይሰ ህለ። ሰበት እለ አውጀዶት ሙደርስን ወዴዕ አሳሲቱ። እለ ዲብ ክሉ ምንመ ህለ ናይነ ላኪን ምን ብዕድ ለፈንቱዩ ዝያድ



ለዐዶታት ዲብ አድብር ወሳሳት ለትፈንጠረ ሰበትቱ እት ክል ለህለዩ ዐድ ሙደርስ እንዴ ረከብክ እግል ተኣድርሱ ኢገብኣክ ምንገብእ ምን ዐድ ሐቱ ዲብ ዐድ ሐቱ እንዴ ጌሰ እግል ልድረሰ ክቡድቱ።

በክት መኣንብታይት ደረጀት ለረክበው ምን ወለዐል ድራሰቱም ናይ አተላላዩ ከኣፎ ህለ?

እለ እንዴ ነቅስ ገይሰ ህለ ክም መስል ናይ መኣንብታይት ደረጀት 13 አልፍ ዶል እንብል

ሄራር ተዕኪም ምዴርየት ሞልቂ



ዲብ ምግባይ ደረጀት 3 አልፍ ወዲብ ካልኣይ ደረጀት አልፍ እንብል ህሉ። እግልሚ ወለ ዲብ አድሕድ ለትቀራረብ እግል ልግበእ ኢቀድረ። እለ ህይ ክምመ ለእቤሉ መካሪት ናይለ ኣርድ ወመዳርስ ብኩይ ዲብ ለህለ ምን አስክ ዲብ ምግባይ አካናት እንዴ አትቀግበልክ እግል ትድረሰ እብ ፍንቱይ ናይ አዋልድ አንሳት መሻክል ህለ። እለ ህይ ለጅነ ዲበ ባካቱ ናይ ምግባይ ደረጀት ምን ረክብ ዲብ እንዴ ለትቀግብል እግል ልድረሰ መሻክለት ወኢሳደፋኒ። እለ ህይ ናይ ምግባይ ደረጀት መዳርስ ዲብ ክሉ እግል ልትባጸሕ ልሰዕ ቅዱር ሰበት ኢህለ። ክምስልሁመ ናይ ካልኣይ ደረጀት አዜ ዲብ እለ ወክድ እለ ዲብ እንዳ ጋብር ሐቱ ፍትሕት ህሉት ሰበት እለ ክልኤ ሌጣተን ለህለዩ። እብሊ ለብዝሐ ደረሰ ዲብ ተሓት ዐቢ ምንመ ህለ። አስክ ለዐል አክለ ጌሰ ላኪን ነቅስ ህለ። ለሰብብ ህይ ምስል መናበረት ናይ ሽዑብ ወሪም መዳርስ ምን ዐዶታት ለልትጸበጥቱ። እብ በቃዕት ላኪን ደሐን ህሉ።

እብ በቃዕት ዲብ ተዕሊም

አልፍ ለህሉ እግልኩ ዳብጦም ለህሌክ ደረሰ ብቅዓም ቶም ወለ ኢትንቱ ለመቀየሲ። እብሊ እብ በቃዕት ዶል ንትሃኒ እብ ክሉ መኣከዲ እንዴ ነስኣነ ለንትሃኒ እብ ቱ። እግልሚ ዲብ እለ ወክድ እለ መንፈዕት ተዕሊም ለኢልኣምር እግል ለህሌ ሰበት ኢቀድር ክሉ ልትጃገር። መቀየሲ ናይነ ህይ ምስል ናይ አቅሊምነ ለህለው ደረሰ እንዴ ርኤነ ዲብ ሰኔት ሓለት ህሉን እግል ኒበል እንቀድር። እብ እሰባት እግል ንትሃኒ ዲብ ናይ 8ይ ፊስል ወናይ 12 ፊስል እምተሓናት አክል አይ ኑቅጠት እንሰጅል ወደረሰ ኑሓልፍ ህሉን እንዴ ርኤናቱ ብቅዓም ህሉን ለእንብል። ዲብ እለ ለሐልፈ ህይ እብ ደረጀት አቅሊም ዲብ አወላይ ደረጀት ህሉ። እት ወጠንያይ እምተሓን 8ይ ፊስል 85.9 ምእታይት ሐልፈው። 448 ደረሳይ አሻረክክ ምን እሎም ለ63 ደረሳይ ሌጠ ተርፈው። ሰበት እለ ለበቃዕት ደረሳነ ሰኔ ህሉት እንብል። ዲብ ሳወ ለገብኣ ናይ 12 ፊስል እምተሓንመ ምን ለሐልፈ ገሌ ምንመ ነቅስ 39 ዲብ

ብዙሕ ኢህላኒ። ምናተ ዲብ እለ ክም መጸውነ ምስለ ቀደምም ለጸንሐምም እንዴ ገብአው እብ እህትማም ሀደፎም እግል ለኣብጽሐ ወደረሳዮም እግል ለአፍህሞ እምበል ሕላሌ ቶም ለከደሞ። እለ ምር ምን ደረጀት ለኣብጽሓቱ። ዲብ ናይ ሙደርስን እብ ፍንቱይ እግል ልትሸራሕ ለወጅቡ እብ እገርም አስክ 4 ሳዕት እንዴ ጌሰው ለልኣደርሶ እቱ ብዙሕ ተዕብ ለልትሐመሎ እቱ ደረጀት ህለ። እለ ህይ ምስል ዲበ መንጠቀት ለጸንሐም ሽዑብ እንዴ ትፋህመው ወእግሉ እንዴ መስለው ሰበት ገይሶ ህቶም ሽዑብ ውሓዱ ለአድርሶ እግሉ ወሽዑብ እግሎም ዲብ ክሉ ጃንብ መናበረት መጦርም ለበጥር እብ በቃዕት ወኣደብመ ጥውራም ህለው። ለካልኣይ ናይ ደረሳቱ። ደረሰ ናይ እለ ምዴርየት ምን መናበረት ርዕዮ ንዋይ ወሐርስ ለመጸውቶም። ዲብ መዳርስ ክም አተው ህይ እብ አደብ ወእህትማም ደርሶ። እግልሚ እብ ክሉ ልቦም እግል ልትዐለሞ ሰበት መጽኤ። እለ ህይ ዲብ እለ መንጠቀትን ብዙሕ ሰኖታት ለወደ አደብቱ። እለቱ ህይ እብ በቃዕት ስሚቶም ውሰሚት ምዴርየቶም እግል ልወቅሎ እቅዱሮም ለህለ።

እት አክር፡ ሕኩመት ዳብጠቱ ለህሌት ሀደፍ ክሉ ሙዋጥን ተዕሊም እግል ልርከብ ከዲምቱ። ሰበት እለ ምስል እለ ሀደፍ እለ እት ክሉ ባካት ለህለ ናይ ተዕሊም መኣሰሳት እግል ልደቀብ ሰልፍ ክሉ ሙደርስ እግል ልትረከብ። መዳርስ እብ ብፍ ወኣላት አስክ መገሰይ ናይ ደረሰ ለቡ እግል ልግበእ። እትለ ምዴርየትን ህይ እለ መሻክል እለ ህለ። ዲበ መዳርስ እንዴ ጌሰኩም ምን ትርኡ ዲብ እበን እንዴ ትገሰው ቶም ደርሶ ለህለው። እለ ለሰኔብ እግል ልትፈተሽ። ምር ደረሳይ ዲብ ጽላል ሰኒ ወመገሰይ ሰኒ እንዴ ገብኣ ለደርስ እብ እግል ለህሌ። እግልሚ ክም ሀደፍ ዳብጦም ለህሌነ ብንደት ወጠን እምበል ብቁዕ ወዳርስ ሙዋጥን እግል ልግበእ ቀድር ወለኢቀድር ዶል እንብል እግል ልግበእ ኢቀድርኒ። ሰበት እለ ሕኩመት ዐቢ እህትማም እግል ቲዴ ዲብ። ወሽዑብ መሻረከቱ ለልኣዘይድ እብ አግቡይ እግል ልዕቤ እትፋኔ ወሸክረን።



78 5



ሰማን ማርስ ወዝክርያት ለምሔርባይት



ምሔርባይት ኤልሰ ተክሌ፡ ምን ደንግብ ሰብዓታት እት ቅስም ጀማረ ጀብህት ሽዕብየት ተሕረር ኤረትርየ እንዴ ትየመመት፡ ምን ናደለየ ምሔርባይት እርትርያት ተ፡ ምሔርባይት ወቀየም ለሀይ ከሀይ ለለአትሓሲ ምንመ ተ፡ ናይ ኤልሰ ፍንቲት ዐለት እግሉ፡ ኤልሰ ቀበት መዕየ ትግሬ እንዴ ገብአት ትትጋደል ዐለት፡ ምን ከበሰ እግል አባይ ትትግገን ሰውረት ትፈግር እት ሀሌት፡ ሰለሕ እንዴ ጸረት ወእት ሳትሮታት ቅብላት ዌረት ወዘምተት እንዴ አግሐመት፡ እግል ትትሓረብ ወእት ጋድሞታት እት ተአረበዕ ወትለንፈ ክሬፍ እግል ቲደየም ወእት ደንገበ ተሩ ለበንዴረት ለሐንቲ እገሮም ኬደወ እብ ሐለተ ምን ናየም ወለዐል እግል ተአተንበልብል፡ ወተሩ ፍዛህ እግል ተአበርግን ለሳረት ተ፡ አግቡይ ወመጃላት ግድለ ብዕድ እት ልበ ይዐለ፡ ምናተ፡ ግድለ የም-አለበ እት እንተ ጸንሐተ፡ ምን አዳብ ምሔርባይት ጀብህት ሽዕብየት ተሕረር ኤረትርየ ሀይ፡ ለአወለይት ትትረተብ ዐለት፡ 'ጸርከ ተ' ለበለውኩ እብ በቃዐት ሰየርት ዐለት፡ 'ሽዐብ ነዝሚ ወአመቅርሐ' ክምሰል ትበሀለት ሀይ፡ 'ሐለቼ ኢኮን'፡ እንዴ ኢትብል፡ እምበል ነቃስ ወተወክ እግል ሐዞተ ቲዴ ቀንጸት፡ ምጅተመዕ ህግያሁ ኢተአምር እግል ትወጅህ ወትነዝም ሀይ፡ አክል-አይ ክቡድ ክምሰል ቲ፡ ምኑ በዴ አለቡ፡ ኤልሳመ ክምሰል ክሎም እለ ለመሰሎ ጸረ፡ ለጸር ክቡድ እተ እት እንቲ፡ 'ክቡድ ይእንተ' ቲለቲ፡ ወአሌፍ እንዴ ትቤ አቲቲ፡ 'እወድየ' ለትብል ክምሰል ኢተሐይለክ ሀይ፡ ኤልሰ እግል ኖሰ ሰመዕ ተ፡ ለገቢል ለእቲ ትየመመት ሀይ፡ እሰልፍ ወለቲ ወምኑ እግል ትግበእ ትበገሰት፡ ብልዑ በልዐት፡ ልባሱ ለብሰት፡ ወለፉ ትወለፈት፡ ዓዳቲ ወዴት ወእሉ መሰለት፡ እሊ ክሉ እት ትወዴ ሀይ፡ ለብትር ለሽዕብየት ከለፈተ እቡ ኢትረሰዐት፡ አግቡየ ዝያደት እግል ተአትጣፍሐ ዐለት፡ ለገቢል ሀይ፡ ፈቲቲ ወፈተየ፡ እብ ፍንቲት ሽዐብ ሀበርታት፡ ለእተ ዘበን ለሀይ ዐለ፡ ሰሚተ አሰክ አዜ ሰምየ ወመርኢተ አሰክ እለ አምዕል የም ልትህገኑ ሀለ፡ እሊ ሀይ፡ እት ሽቅለ አክል-አይ ክምሰል ነጅሐት ለለአሰብት ቲ፡

እሊ ጃል ለምን ሰላሳታት አሰክ

አርበዓታት ሀለ እም-ሞልዱ ኤልሰ ተክሌ ተ፡ ምን አርበዓታት ወለዐል ሀይ፡ ሕቡብተ ለኢነስኦ ወእዴህ ለኢጠሰቲ ወሕግኩ ለኢሳፊቲ ሀለ ኢመሰለኒ፡ ደለለአምረ ሀይ፡ አክለ ፈቀደየ፡ 'ያረቢ እት እለ ሀሌት ኖሰክ ሰልመ!' ልብል ወእብ ኪር ልትድዴ እግሉ፡ እብ ፍንቲት ለዐበዩ፡ 'ኤልሰ ለእዴህ ኖሰ ሰራይ ተ' ልብሎ፡ ህታመ፡ 'መሰከብ ወመታሊት ሕረይ' ምን ትትበሀል፡ ቶቤኮ ሰልፍ ሀብርታት ወሰብኡ ወሐፊት መሰለኒ፡ ጅንዲ ጀብህት ሽዕብየት እት እሉ ሀለ ሽቅል ለሀሌ፡ አካን ለእተ ውዕል ሀለ ምሴ ልትመዩ እተ ሚ ኢፋሉ፡ ህቲ ደልየ ይዐለ ውብዕድ፡ ትበገስ ዶል ልትበሀል፡ 'አሰክ አየ፡ ወአፎ ምድር ኢጸቤሕ እዩ፡ ወአፎ ቤቼ አክብ ኢተሐድጉኒ፡ ወአፎ ግረ እለ እትፋኔ አሰክ እረክብ፡ ሀያይ ኢትብሎ ምንዩ?' ልብል ይዐለ፡ ኤልሳመ ዶል ከመሰከብ ምርት አሰኩ እት ትነክሱ እት ለትፈናተ ደረጃት



ሰልጠት፡ ክሉ ሰሕል ልትበሀል ለዐለ ምድር እብ ተር-ተረት በጽሐቲ፡ ለሽዐብ ለእሉ ፈቲት ወክድመት ወመርሐት፡ ወፈትየ ወለአምነ ለዐለ፡ ህግያሁ እንዴ አመረት፡ እት አትፋዝሶቲ ተረተ ምን አምዕል እት አምዕል እት ትዘይድ ጌሰት፡ እት ደንግብ ሰማንያታት ሀይ፡ መሰሉለት ምዴርየት ቅርረ ገብአት፡ እት የም 05 ወሬሕ ማርስ ሰነት 1988 ሀይ፡ እብ መናሰበት ሰማን ማርስ ዒድ አዋልድ አንሳት፡ ሽዕር ትግረይት እንዴ አፍገረት፡ እት ክርን ገቢል ነድአተ፡ 'ለህግዩ ሰኒ ይእመልኩ፡ ምናተ እፈትየ ወሰብኦ እፈቲ ከእበ ሽዕር ጀረብኩ ወንዮቼ እግል እሸረሕ ወጠንኩ፡ ከሸከፍ ምን ሀለ እተ፡ ሳምሐኒ ወአርትየ እዩ፡' ለትብል ተውሰየተ አትሌተ፡ በርናምጅ ክርን ገቢል ሀይ፡ ለሽዕረ ክምሰለ እለ ካትብተ ዐለት እት ራድዮ ቀደመወ እግሉ፡

‘ለትከተበት ኢትብዴ! ወለኢትአከበት ኢትረከበት’ ክምሰለ

ልትበሀል፡ እንድግህ እት ተሐንፍል ለሽዕር ለእት ማርቶ 1988 ትከተበት፡ እት ማርቶ የም-ዓመት እት ወረቀቲት ዕጽፍት ጸንሐተ፡ ቀዳሚትክ ለተአትፋቅደክ ሓጀት ዶል ትሳድፈክ ሀይ፡ ሐር ተዐቀብል፡ ወምነ ሐልፈ ተየልል ገሌ ለሐሳሌ እትከ፡ ከኤልሳመ፡ እለ ገብአት፡ ሐቀ ሐድ ሰላሰ ወሴዕ ሰነት ሀይ፡ ትግረይት እንዴ ትፋቀደት እግል ትከተብ ትበገሰት፡ ምናተ፡ መደት ብዝሕት ሰበት ትፈንቲተ ክምሰል ምራደ ኢገብኦ እግሉ፡ ለሽዕር ሀይ፡ ክምሰለ እለ ዐለት እቼ ነድአተ፡ እንዴ አሰክኩ ወምሰል እለ ሓላት ለሓድረት ክምሰል ትትመሳኔ እንዴ ወዳክወ፡ አሰክ በርናምጅ ክርን ገቢል ወጀሪይት ኤረትርየ ሐዳሰ እግል እልአክ ትወሴተኒ፡ አነ ኤልሰ ሰልፍ ክለን ጅኑድ ለአመርክወ ምሔርባይት ተ፡ እምዩ ዐለት ምን እብልመ ሐሰት ኢትጸብጠኒ ምኑ፡ ጸገም አሰነየተ እቼ ሐቀ ሰኢቲ ሀይ፡

አናመ፡ 'ርኬበ እቼ'፡ እቤ ከትበገሰኩ፡ ወሐለቼ ተ ዋዲ እተ ሀሌኩ፡ እሰታዝ መሐመድ-ሰዒድ ሓምድ ቅሰም መናህጅ ደውለት ኤረትርየ አሰመረ



ኖሪት ዋልደይት ተ ወምሔርባይት

ጽልመት እግል ትገልጽጽ ጀላብ ዐማር ምህርተ ሰደተ ድድ እሰትዕማር ሐቀ እግል ተአሰብቲ እት መሓብር ሺመት እግል ትትናወል ወመናብር ሕርየት ናይ ዐደ እግል ተአዳብር ወሕርየት አንሰይት እግል ተሓብር እብ ዕጽፍ ግድለ ነዌት እግል ትናድል

ጨቅዋ ምን ዐጽፈ ዲበ ወአጥረሰየ ንኡሽ ልግበእ ወዐቢ ምን ቀበየ ኖሰ ለዋልደቲ ምን ትበረየ እብ ሐሊበ ለልሕም ክም ትረሰዐየ ነዌት እግል ተአርኤ ለወቀየ ከቃዊ ረትዐ ዲበ ለገበየ

ዘልም ናይ ቀዳምያት እግል ለአክትም እብ ረቢ ቀስመየ እዩ ሕኔት ተአዝም ገበይ ክፈሕ ሐፊት እግል ትተልም ምን እሰትዕማር ግመ እግል ተአሰልም ወእግል ዌርሰተ ተእሪክ እግል ትሰልም


ኖሪት ዋልደይት ተ ወምሔርባይት ክቡድ ምርዊት ተ ወሴምደይት ረሕመት ተ ሕርመት መኣዝመይት ጀህ ተ ወኖር መርትየ ወማክረይት ሕጌ ተ ወክሌብ መድሕነይት ዒጸት ተ ትንክበ ወራድአይት ደፍአት ተ ኤማን መዐንድቀይት መንገፎ ተ ረድኢት መዘንደይት ከማል ተ መሕበር መክምለይት ዐገል ተ አደብ መክዕበይት ዕልም ተ ገበይ መሐብረይት ዋቅየት ተ ናሰሐት ወካድመይት ግዊት ተ ብሶት መትብእሰይት ግረ ተ መርባት መቅሰነት ክሉ ተአደርሩ እንዴ ትበይት

ኖሪት እት ቀቡብ ወለአትንኡሽ ናቅሰት ተ እት ልብሎ ለአትባኩሰ ብዞሕ እት ጋድእወ ወለሃሩሰ መሃይ ናቅሰት እንብእ ትቤ ኖሰ ትከምከመት ከቀንጸት እግል ንዌት ግድለ ድድ አባየ ወጩቅጠተ ኖሪት ኢትደብደበት እብ ድቢተ ህተ ለወዴተ መድገሚት ተ ውጽዔ ኢከርዐተ ምን ትግብኢተ ኢፈርህተ በይን ወግድዐተ ኢከርዐተ ጸሓይ ሀራራተ ኢገዌቲ ላሊ ጸለምተ ይኡበሀጀተ ግሎት ለእብ ሐሪሽ አባይ ወጠቢዐት ምንመ ትሳደ እተ አግረረቲ እንድ-ኢኮን ኢገረት ህተ ምን ዐጂነት ፈራሰት ቲ ክሉ ለገርብ ሐጠር ጢነተ ቲ ወመሩገ ፈርህት ኢትደልየ ምን ለሀዱገ ምን ትትጸገም፡ ኔዋተ ኢወሩደ ወምን ተሐምቅ ትገይስ እብ ዕሉገ ጽጎት እት እንጎሆ ወዐጭመተ ትገርብ ወትትባልሐ ለክትፈተ ዐውቲ ክሪተ ተ ወሐዞተ አርወሐት ከርብን ክሪት ሰብልተ ዐደ እበ ደመ ሕርርተ አባይ ኢትፈግሩ ለምሽዊተ ወፈታይ ደግም ነብር ቅረዲተ

ዐለም እብ ሐቅ ወአማን ምግትተ ናዩ ለቴለተ እብ ደም እሰብትተ ዌርሰይተ ሐቀ ይብትተ መሳዋት ወሐቅ ፋግር እውርሰተ ሰማን ማርስ ዕላመተ ወተአምራተ ኖሪት ኖር ከደን ተ ወኖር ደገ ትንበር ወተሀሌ እዩ ህተ! ኤልሰ ተክሌ - እሰባልየት ሐዝሐዝ አሰመረ



ከዛን ምህዳፍ፡ መርሀዮ ምን ሼካፍ



አሰይድ መሐመድ-ዐሊ መሐመድ ፋይድ

ምን መዲነት አፍባቢት እንክር ምፍጋር ጸሓይ መሳፈት ሰማን ኪሎ ምትር ክም ሄረርኩ ዎርት ድጌ ፍንጌ ክልኦት ደብር ጸንሐኩ። እሊ ድጌ ቀደም እሊ እት መንበረት ሰብክ ወሰግም አዳሙ ፍንጡር ወደላ ማይ ወሰበር ረክብ ዲበ አርደት አሰከ ልግዕዝ ነብረ። ምህዳፍ ዎር ምዕዋን ትነበር ለዐለት ወሐር እት ሰነት 1990 ምስል ተየልል ሐርብ ተሕሪር አፍባቢት ወገጽ፡ እግል መጀርሒን ዲቨ ሸቢ ዕደደት ገብኦት ዲበ። እት ወክድ ለሀይ እብ ሰብሐ ልጁ እ ወእትዕማር ሸብሐ ባካት ሐድ ሰበት ዐላ፡ ለምጽም እ ኦካነት ዕደደት ወመጀርሒን ክም ሐድረወ ማይ ሲቶም እብ ቦጣት እግል ልምእኦ ላዝም ዐላ። ወላመ ሰካን ምስል መናድሊን ሰቲ ዐለው። ግራሁ፡ መናድሊን እግል ሸብሐ ዓለ ድሪል ሐፍረው እሉ ከምን ምግግዝ ወሰብኩ-ሰግም ክም ለሐድር ወደወ። “እሊ ምህዳፍ እት ሰነት ቅዱም እምበል ገቢይ ሰብ ሰብክ ወሰግም እብ ንዋዮም ኬን ወእንሰር ለሐሉፈ፡ መሕደር ይዐለት። ወለሰብ እብ ኢረኪብ ማይ ቲ። ዓላሀ ሐቲ ዓለ ቂጨብ ወሼካፍ ሰበት ዐለት። እግል ኩሉ ካፍየት ኢነብረት። ሰበት እሊ፡ እት ወክድ ሰብነት ወሐፋነት አዳም ልግዕዝ ምን ወልትጀረሰ ነብረ” ልብል ምን ሰካን ምህዳፍ አሰይድ መሐመድ ዐሊ መሐመድ ፋይድ። ምህዳፍ እትሊ ወክድ ጎን መሕደር እንዴ ገብኦት፡ አዳመ ምስል ነብር ወእጀኒቲ ለአደርስ ለሀላ፡ እት ሰነት 2016፡ ሕኩመት ኤሪትርያ እሊ ዳሕየት ምስል ዐለ እሊ መሕገዝ ማይ፡ ከዛን ንኡሽ እግል ልትሸቂ እሊ እብ እዳሪት እብ ፈግረ ስታት ካርያት ማይ፡ ሸርም ትብኝ እሉም።



ከዛን ምህዳፍ፡ መርሀዮ ምን ሼካፍ

መልኦ፡ ለሕሊል ምንተሐቲ ዘሬ ወእት ክል አካን ሻከት ዶል ተሐፍር ማይ ጽፋይ ወጥዑም ምን ሐን ምድር መጽኦኩ። ንዋዮም ወርሐም ክም ትረይሐው፡ ወሰማይ እግሉም ሌጠ እንዴ ኢገብኦ፡ እግል ባካት ብዕድመ ጋብእ ክም ሀለ አሰይድ መሐመድ ዐሊ ለሓኩ። “እሊልፍ እሊ ከዛን እት ድጌ ሳብት ክም ንትከምክም ወዳ። ሰለሰ ዐድ ምን መፋላቅ ናይ ገለብ የምሆ ወምህዳፍ ህይ ናይ ምዴርየት አፍባቢት እትላ ሓድራም ሀሌ። እሊ ከዛን ክም ትብኝ እግል፡ ጀላላ ማይ፡ 750 ቤት እትላ ዳሕየት ሐደር። እሊ የም ሸቂይ እግልን ለሀለ ከዛን ምንዲ ኢለዐሌ ላኪን፡ ለአዳም ወኢሐድረ። አዳም ማይ አሳሰ መንበረቱ ወመሐደርሁ ቲ። ምድር ማይ አለቡ፡ ኩሉ መክሉቅ አሰክላመ ሰሬራዩ ለሃጅር ምን። ከሕን የም ንዕመት እት ሸፍርን ረከብክ ወምን ጽምእ ኦባሬን ወንዋይን ወርሕን ትረይሐኩ፡ አሰክ ወሬሕ ማየ ህይ እሊ ማይ ካፊና ቱ” ልብል። ምህዳፍ እብ አንፋር ዲቨ ሸቢ እሊ ዝያድ 30 አልፍ ምትር ሙከብ እግል ልጽበዋ ለቀድር ከዛን ክም ትሸቀ እሉ፡ እት ድጌ ሓድር ወሸብብ ሳክን ትብደለት። እትላ ሃድል የም ምህዳፍ፡ 4,500 ነሰመት ምን አዳም ብዲበ። እሊ አዳም እሊ አግል፡ አባግዕ፡ ሐ ወእንሰ ታውብ ቲ። ለንዋይ፡ ምን ከዛን እንዴ ሬመ ሸቂይ እግሉ ለሀለ ሰማይት ምን እት ሰቲ ወአድብሩ ዲቦ እንዴ ትሻፈለ ሰዐሩ እት በሌዕ ዶል ትርእዩ፡ “እብ አማን ክል መክሉቅ ማይ መንበረቱ ወደማነት ሀለዮቱ ቱ” ለኣተብሰኩ። “ለከዛን ክም ትብኝ ሚ ረሀየት ረከብኩም?” እት እንብል እግል ወድ 70 ሰነት ላቲ አቡን መሐመድ ዐሊ ፋይድ ስሉላሙ ዐልኩ።

ህቲ እት በልሱ፡ “ሰካን እሊ ከዛን እግል ልትበኔ ክም አንበተ ትረይሐው። ‘ማይ እግል ንርከብ ከዛን ልትበኔ ሀለ’ ዶል እንቤሉም፡ ኩሉም አንሶም ወተብዑቶም እብ ነሐርም እት ከዛን እግል ልሸቀው ጠብ ተዐንደቀው። እብ ሰላዲ ወእብ እክል መዳንን ወሐሰየትላ ከዛን ዲብ ካረርት ህይ፡ ሐዋቶም እት ሸቃየ ሰኔ ዛይደት ዐለት። እብላ በክት ሸቅል እንዴ ረክበው፡ ምን ሕኔት እግል ሸቅል አርድ ብዕድ ልትሸብው ለዐለው፡ ነብረ እብ ሸቅል ወየምየት ሰላዲ ምን ቅሩብ እት ሸፍሮም ወዐማር ድጌሆም ረክበው። ወእብሊ

ምህዳፍ፡ ምክያድ ወምሕላፍ ገቢዩ ለዐለት ሸብብ ናር፡ ገብገብብ አፍባቢት፡ ህካፍ፡ መፋላቅ ወየምሆ፡ የም እት ቀበተ እንዴ ሐድረው ንዋዮም ወአርወሐቶም ማይ ምን ቅሩብ ሰቲ ወምን ምግግዝ ወሐሊፍ ህይ እት መስከብ ዳምር ሓድራም ሀለው። ማይክ ዋዑም ምን አፍያትኩ፡ ምን እሊ ትዋዕም ረሀየት ኢህሌት” ቤሉኩ። እት ሸቅል ሚርሓይ ለዐለ መሆንድስ ክፍላይ፡ “እሊ ሸብብ እሊ፡ ማይ ኢኮን ሰኔት ብዝሕት ምን እንወዴ እሉሙ፡ ለካድሙ እግል ሰውረቱ ወኢፈዴናሁ። ማይ እት ድጌሁ እግል ኒዴ እሉ ህይ ዋጅብና ቱ” ልብል ክም ዐለ አሰይድ መሐመድ ዐሊ ለሓኩ። ለክልኦት አወድግ ምህዳፍ፡ እት ክልኤ አካን እንዴ ትካርዐው፡ ማየም ባጥር ወእት ረአሱ ሸብ ሓድር ዶል ትርኢ፡ ወለባካት ዕጩ ወንዋዩ አርወሐት እንዴ በልሰ ወእንዴ ገምለ ወትረሸደ ጋኑ ሳክብ ዶል ተአቀምት፡ እንታመ ለጋንክ ምስሉ ሰክብ ወደሚርክ ልትረየሱ። እብ ፈድል ሸርም ምህዳፍ፡ እት ባካት ለሀለ ዕጩ እንዴ ገምሉ፡ ቅሰላ፡ ዐቅቡ፡ ዐዳይ፡ ቆግ ውበዕድ

ጋምል ሀላ። ለሸብብም ምን ባታክ ዕጩ ጅሙል ቲ፡ ሰበቡ ህይ ምን መደት ሰውረት ዕጩ መሐብሂሁ ምን ዋያራት ወአባይ ወመጽለሊሁ ምን ጸሓይ ሰበት ዐላ፡ ቂመት ዕጩ ለልኦምር ወለኢባትክ ሸብ ቲ። ውሒዝ ወውልዋል ለይአውደቀዩ፡ ዕጩ በጥር እት ፋሰ ለኢከሬ ሸብ ክም ቲ በዐል ገጽ ወእዳሪላ ዳሕየት ለዐለ አሰይድ መሐመድ ዐሊ ፋይድ ወዳሕ። ምህዳፍ ከዛን ንኡሽ ሰበት ትሸቀ እሉ፡ ተሐደረት ወእት ገማል ትሄርር ህሌት። እሊ ሸብ እግል ርሐ ወንዋዩ ማይ ራክብ ሀላ። ሐርስ እግል ለአግምሎ ወጀራዲን ነኦይሽ እንዴ ወደው ክም ከመዶር፡ ባምየት፡ በሰል ወበርበሬ እግል ልዝርኦመ እዳሪት ሐድ አርበዕ ሄክታር ለትገብእ አካን እግል ትካፍሎም ወምን እሊ ከዛን እት ለአሰቲ፡ ክል ነፈር አሰክ 25 ምትር መረበዕ ለትገብእ ብቅዕት ምድር እት እግል ልሕረሰ ወጃርዲናይ ኖሱ እግል ለአግምል ሕቡራዊም ክም ሀለው አሰይድ መሐመድ ዐሊ አፍህሚ። ማይ ሐቆ ሀላ፡ መሕደር ህሌት ወኬር። ማይ ሐቆ ኢህለ ላኪን ሕያይ አሰክለ ሰቲ ወበሌዕ ዲበ አካን እግል ልግዕዝ ቲ። እት ባካት አፍባቢት እምበል እሊ ከዛንመ እት ገብገብብ ግድሬን ውበዕድ አካናት ከዛናት ነኦይሽ እንዴ ትሸቀ፡ ለገቢል እግል ልሕደር እብ ዲቨ ሸቢ ወሰካን መዓዋን ማይ ልትሸቂ ሀላ። ሸብላ ባካትመ እብሊ ከዛናት ለረክበዩ ረሀየት ማይ ሲቶ ወገማል፡ ምን መንበረት ሰብክ ወሰግም እንዴ ሐድረ እት ደገጊት ልትከምክም ትርእዩ። ሰበት እሊ ነኦይሽ ከዛናት እት ኩላ ወጠን ረሀየት እግል ሰካን ካልቅ ክም ሀላ፡ ሸርም ምህዳፍ ሰመዕ በሲር ቲ።

ሕሽመት ሰማን ማርስ....

ምን ገጽ 2 ለተላለ

ናይለ አቅሊም ፍርቀት ዓዳት አራግ ህይ ለዲድ ዝያድ አግመለቲ። መንደፈራመ ዲድ ሰማን ማርስ እብ ደረጃት አቅሊም ግብለት ተሐደረት። ዲብላ ወካይል ሸብብ አንፋርቅዋት ድፋዕ ለሻረከው እት ዓደት፡ ዐጃይብ ፈራሳት ኤረትርያት ለለሐምድ ዕፌ ፈን ወናይ ተአዩድ ከሊማት ትቀደሙ። መስኡለት ማሕበር ናይለ አቅሊም አሰይድ ሰናይት አፍወርቂ ዲበ አሰምዐተ ከሊመት፡ ማሕበር፡ ሕርየት አንሳት ለበበ ሀደፍ ዐማር ወዐቡት ሙጅተማዕ አክዶት ክምቲ እንዴ ሸርሐት፡ ሸብብ ኤረትርያ ዲብ ቀድየት አክዶት ሕቁቅ ወመዋሳት አንሳት ለሰጃለዩ ሄራር ወጠውሩ ለሀለ ተፍኪር ራትዕ ወፈሃዕት ምን ለአሸንን ተአሪክን ወሰዋልፍን ክምቲ አብርሀት። መሻረከት ወመጃገረት አንሳት ዲብ ተዐሊም ወምህናት ሰኔ ትገይስ ክም ህሌት፡ ዲብላ አቅሊም እማት እብ እቅትሳድ እግል ልዕባ ወዐዋዲ ዴራይ እግል ልሰረት ገብእ ለሀለ ግድለ ለለአትናይት ተቅዩር ልትረከብ ምን ክም ሀለ ሐበረት። ሓክምለ አቅሊም አሰይድ ሃብተኣብ ተሰፋጽዮን እብ ጀሀቲ አንሳት ምን እግል መሳዋት ለወድያሁ ግድለ፡ በቃዕት ወመጃገረት ዲበ ትወቀለት ደረጃት እግል ልብጽሐ ገብእ ለሀለ ጅሀድ ፍገራቲ ዲብ ትትርኤ ትመጽእ ክም ህሌት ሸርሐ። እብ ደረጃት አቅሊም ግብለት በሐር ቀየሕ እት የም 8 ማርስ ዲብ መዲነት ዐሰብ ዲብ ውሕዳት ጀብሀት ምፍጋር ጸሐይ ለሀለዩ አዋልድ አንሳት ወሰካን ዐሰብ ለሻረከዩ ዲብ አሰራር ሰላም ወዕፌ ፈን ለገረመ ዲድ ገብኦ። ሓክምለ አቅሊም ሰፊር መሐመድ ሰዲድ መንታይ ክምስልሁመ መስኡል መክተብ ጀብሀት ምፍጋር ጸሐይ ኮሎኔል ጸሃይ ወልዱ ለልትረከዩ እቶም ሰብ መዝ ህይ ሻረከው።

መ ሰ ኡ ለ ት መ . ወ . አ . አ . ኤ . ምዴርየት ዐሰብ አሰይድ ሩተ ተኪኤ ህይ፡ ልክት መሕበር ቀደመት። ሰፊር መሐመድ ሰዲድ መንታይ እትላ ሐለፊዩ ልእክት፡ አዋልድ አንሳት



ለኢሻርክ እቲ ተጠውር ክም ኢልትዐወት አሸራ፡ እብ ሰብብ ባለ ለመድ ምን አብካት እንዴ ኢልትዐንቀፈ ወአምር ወምህነት እግል ልትዐንደቁ፡ ኩሉ እግል ልክደም ዲብ ክም ወጅብ አትፋቀደ።

ዲብላ መናሰበት፡ ዲብ ወጠንያይ እምተሐን ያይ ፈሰል ንቃዋ ሰኔ ለአምጽአየ ወእብ መናሰበት 8 ማርስ ዲብላ ገብኦ ጀግራታት ማዕሉማት ዓመ ለተዐወተዩ ጃኢዛት ተሀየቡዩ።

እት ሳወ ህይ ሰማን ማርስ የም 08 ወ09 እብላ ትፈናተ በራምጅ ተዐየደት። ቃይድ መርከዝ ተእሂል ክድመት ወጠን ኮሎኔል ደበሳይ ግዴ አንሳት ኤረትርያ ዲብ ንዳል ጀለ ተሕሪር ወሐቀሁ ተረት ዛይደት እት ክሉ መጃሳት እግል ሐቀቀያሁ ዐውቲ እንዴ ሐመደ ታርፈት ለሀሌት እግል ትትመም ወዴራይ ዐዋዲ እግል ልሰረት እብ ዓመት ክሉ ገቢ ወዝያድ ሸባብ እብ ሕሰር ዐቢ እግል ልሰቀው ትፋኑ።

መስኡለት መሕበር እት አቅሊም ሳወ አሰይድ ደሃብ ዘርኢይ እብ ጀሀተ ሕርየት አንሳት ምስል ሕርየት ክሉ ገቢል እንዴ ትወሰክት እት ወጠንየት ወሕቁቅ ኦደሚ ዶር ዐቢ ክም ወደ እንዴ አፍህመት፡ ክምለት ወዋቅየት መሻረከትን እግል ትትአክድ ለጸገም ክም ኢለአትካርም አክደት።

እት ደንጎበ እት ለትፈናተ ጀግረ ለተዐወተዩ ጀዋእዝ ተሀየቡዩ። ሰማን ማርስ ዲብ ከሰላሙ፡ ኤርትርያን ሰካን ከሰለ - ሱዳን፡ ቀላየት ታእሪክ ወዐጃይቦታት ኤርትርያን አዋልድ አንሳት እብላ ሸፊሕ ዕፌ እብ ነያረት ዐየደውው።

መስኡለት ፈሬዕ ተዕሊም ዲብ ሱዳን አሰይድ ሮክረጼን ሃብተሚካኤል እትላ አሰመዐየ ከሊመት፡ 8 ማርስ - ለዲብ መደት ንዳል እግል ሕርየት ወሐሸዋት እስትቅላል ለትርኦ ዶር-ውቁል ናይ አዋልድ አንሳት እንዴ ተዐቀበ እግል ለትወቀለ ፍገራት ቀልን ለእንጀድድ ዲበ አምዕል ጌማም ክምተ እንዴ ሸርሐ፡ የም ዓመት አ'ተረዶት መሻረከት አዋልድ አንሳት ዲብ ዐማር እንዴ ረከዘት ትትዘከር ሰበት ህሌት፡ አትያመ ለህሌን ሰእየት ለተሀይብ መርሐለት ለለኦርኤ ክምቲ ወድሐ።

መስኡለት ፈሬዕ መሕበር ወጠን አዋልድ አንሳት አቅሊም ከሰለ - አሰይድ ዮርዳኖስ አማሬ እብ ጀሀተ፡ ኤረትርያት ዲብ መደት ንዳል ወአድመኖት እስትቅላል ለአርኢያሁ መሳዋት፡ ዲብ መርሐለት ዐማር እብ ለትወቀለ እግል ልክደመ ለትከሰተ አብካት እብ ዋጅብ እግል ልትካፍዕ እብ ርእየት፡ ለለሐብን ክምቲ እንዴ ሸርሐት፡ ዲብ ከሰለ ለሀለዩ አንፋር መሕበር ምን ለልጠላብ እግል ሊደየ ዱሉያት ክምተን አክደዩ።

ዲብላ ዲድ፡ መሕበር አዋልድ አንሳት ሱዳን ወመሕበር መሳኒት ኤርትርያ ወሱዳን ከሊመት -ተአዩድ አሰመዐው። ዲብ ደንጎበ ህይ ለአምዕል ለሸፊሕ ዕፌ ዐዳት ወፈን ትቀደሙ።

ዐመልየት መደውሻሽ ናደው እዝ ዝሕረት ፍርሰነት እግል አጅያል እርትርየ

ዶ/ር ዐመር ዐሳማ

እት ተአሪክ ንዓል እርትርየ አላፍ ነኳይሽ ምግባያም ወወባዩ መግርክ ጋብኣም ቶም። እትለ ዐባዩ እግል ሓቱ መዕረከት ምንሉ ብዕደት እንዴ አትጃግርከ እለ ትፈድብ እግል ቲበል መረ ክቡድ ቱ። ተሕረር መዲነት ነቅፈ ምን ትብል። ዐመልየት አሰሳ ትቅብ ትብል እትኩ። መደውሻሽ ናደው እዝ ምን ትብል ፈንቅል ትሸቡ። ሳድስ ወራር ምን ይእንጋብህ ህዩ እለ ዐውቲታት እለ ወመጸአ ገብእ ትብል ከምን ዐውቲ መትሰባል ወሰቢት እት መባጥር ቀደም ክሉ ትወድዩ። ፈንቅል እግል እስትዕማር አቶብዩ ወደርጊ እብ ሕልቅሙ ለሓንቀት ወባነ ሕርየት ለአምጸአት መዕረከት እት

ገብእ። ናደው እዝ ህዩ እግል እስትዕማር አቶብዩ ዴጸቱ ለሰብረት መዕረከት እግል ኒበለ እንቀድር። እት አክር ህዩ አትጃጋር እንዴ አዘምከ ምን። አሰናይ ምን እለ በዐል ሰብር። ዕውት ወበዐል ኤማን ገቢል እርትርየ ትወለድኮ ትብል። ከዐመልየት መደውሻሽ ናደው እዝ አሳስ ናይለ ቀደሚህ ገብእ ለዐለ መግርክ ተ። እት ሰነት 1987 ሌጌ። ዴሽ ሻዕቢ ሓድ ምእት ወሰሳ ወሰማን መግርክ እት ጅወት አባይ ክም አጅረ ልትሸረሕ። እሎም መግርክ እሎም ህዩ እግል አባይ ሽንርብ ዐባይ ለወደው እቱ እት ገብኡ እግል መዕረከት ናደው እዝ ህዩ ገቢይ ለአርሐው ቶም። ናደው እዝ እግል እት ድፍዓት ነቅፈ ወአፍዐበት እግል ሰዕ ሰነት ዕስኩር

ለዐለ ዴሽ ሓድ ዕስረ ወክልኤ አልፍ ብዝሒ ለዐለ እሉ ዴሽ እት ገብኡ። ዴሽ ሻዕቢ እት ሰልአስ ዮም ክም ፈኔ ወደዩ። ዴሽ ሽዕብየት እብ ገቢይ ዐይን ወብዕድ ለረክበዩ ሓብራ። እብ ረቃቅ ወምስጢራይት ገቢይ መዳላዩ ሓቀለ አትመመ ምን ዮም 17 አስክ 19 ማርስ 1988 መዕረኩቱ አንበተ። እት መዕረከት መደውሻሽ ናደው እዝ ዴሽ ሻዕቢ። ክሉ ጅንስ ተሰልል ሓርብ ቱ ለትነፈዐ። ገጽ እብ ገጽ። እብ ድማን ወገለብ። እንዴ ተሓበዕከ አካን ቅያደት ሆጂም። እግለ ለሀርቦ ዴሽ ከፊዕ። ዐረዮት ወብዕድ። ዴሽ ሻዕቢ እት ድፍዓት ነቅፈ ወመሓዝ ሕዳይ ለዐለ ድፋዕ ዴሽ አባይ ሰብረ። እብ ማንራራብ በሐር እንዴ ወደ እግል ሳሳት ፈልከት ወአዝሀረ እት ደብኡ። እግለ ለሀርቦ ለዐለው ዴሽ አባይ ከርደነው። እብ ግረ ምን ጅወት ወጠን ለመጽላዩ ውሕዳት ዴሽ ሻዕቢ መ ዐለዩ። እብ ክሉ ለጅሃት ዶል ትርእዩ። ዐመልየት መደውሻሽ ናደው እዝ እግል አባይ ትንፋስ ለትክልኡ ሻፍገት መዕረከት ተ ለዐለት። ዴሽ ሻዕቢ ክም ኤታት እግለ እት ቀበት 48 ሳዕት አፍዐበት እግል ሓረርት ስቱቱ ለዐለ። በርናምጁ እንዴ አግደ ሓድ ዐስር ሰማን አልፍ ዴሽ ደርጊ ምን ለሞተው። ለትጃርሐው ወለተሓሰረው እንዴ ወደ። እት እድገዩ እግል ትትዘከር ለትቀድር። ዐባይ ናይ ዕስክርየት ዐውቲ ሰጀለ። እት መዕረከት ናደው እዝ ሕምስ ደባባት። ምእት ዐረባት። ሰሰ መዳፍዕ ወዕስረ ድድ ጣኦራት ወአላፍ ቀለል ወክቡድ ሰላሕ ርዝቅ ሰውረት እርትርየ ገብእ እት ህሉ። እብ ተውሳክ ሰልአስ ውላድ ሶቭዬት እት አፍዐበት ትሓሰረው። እግል መደውሻሽ ናደው እዝ። ለእሙር ኬትባይ ወሳሕፊ ባሲል ዴሽድሰን “ሓቅ ዐመልየት ዴን ቤየን ፋ። ለዐበ እብ ሰውራት ምን አጅል ሕርየት ለትሰጀለ ዐውቲ” እት ልብል ሸርሕዩ። እለ እት ለዐለ ባሲል ዴሽድሰን ለበለዩ። እግል ሽዕብ እርትርየ ምህም ወእግል ዐመልየት ፈንቅል እብ ወዳሐት ለሸፊሕ ቱ። እት ጅወቱ እንዴ አቱነ ዶል እንርእዩ ህዩ። ሰውረት ሼትናም ድድ ፈረንሳ ለወዴተ ዐመልየት ዴን ቤየን ፋ ምን ሸሀር ወለዐል ለነስአት እት ገብኡ። እግል ሰውረት ሼትናም። እብ ሕብረት ሶቭየት ወቻይነ ትትሰዴ ዐለት። ከእግል እለ መደውሻሽ ናደው እዝ። እምበል ኦሮ ስዴያይ ለይዐለት እለ ሰወረት እርትርየ (ዴሽ ሽዕቢ) እት ቀበት 48 ሳዖታት ለተመት ምስል ዴን ቤየን ፋ እግል ነኡትጃግረ ራቴዕ ኢመሰለ። ምኑ ተዐቤ ወትቀሌ። ከሸባብ ዮም ወዕሙማይ ሸባብ እርትርየ ምን ዐመልየት መደውሻሽ ናደው እዝ ሚ እንደርስ እንቤ ምን ገብኡ። ምህም ሰኣል ቱ። ምን እለ ዐመልየት እለ። ሰባት መባጥር ሓቱ ተ። እግል ሚ ዴሽ ሻዕቢ ምስል ሻዕቡ እትለ መርሐለት እለ እግል ልብጸሕ መራር ከህሉ። አላፍ ሹሀደ ደፊዐ። ዋይዲባት አባይ ጋብህ ወብዕድ። እት አክር ህዩ እንዴ ተዐወተ ፈግረ። ከክም ሸባብ እት ራቴዕ መባጥር። ኢመትሓላል እት ዐውቲ እግል ለአብጺሕ ክም ቀድር ምን ዐመልየት መደውሻሽ ናደው እንደርስ። ለኢሐረ ሓሪር ኢሉብስ ለመሰለ ተ። ክል

ዶል ዋዕም ወውቅል ዐውቲ ሓቅ መሪር መራሕል ክም መጽእ እግል ነኣምር ለአትሐዜ። ብዕድ ምን ዐመልየት መደውሻሽ ናደው እዝ። መተንኮብ እት ኖስ እንደረሰ። ብዕድ ነፈር ለወደየ እከ ጠዐም ወለዘት አለበ ወዲመ ምራድ ሴድያይክ እግል ተአትምም ወምሰሉ እግል ኢትትበአስ እት ትትሓፈዝ ክም ምራድከ ኢትሄርር። ሰወረት እርትርየ ህዩ። ለክልኤት ከሌብ አምሪክ ወሶቭየት ምኖም ሰዳይት እንዴ ኢተሐዜ። መሻክል ሸዐበ እት ባልሕ ወአባይ ትፈልል። እት ዐመልየት መደውሻሽ ናደው እዝ በጸሐት። ከክም እት ለዐል ለሸራሕናሁ ሸባብ ምን ዐመልየት መደውሻሽ ናደው እዝ። ዩዝ ገቢል ግብአት። ኢመትሓላል። ራቴዕ ዩክር ሀለዮት። ክሉ ሓቅ ወጠን። ካድም ትፋድ ወራቴዕ ቀራር እግል ንድረስ እንቀድር።

ሕነ በዲር ስሙያት!

ሕነ በዲር ስሙያት- ወአዜመ ሕናቱ ወሕናቱ ምን እምብል- ዋጅብ ዲብነ ወሐቅናቱ ተአሪክነ ኖሱ ለሓኪ- በዲር ለዐለ ወሀላቱ እነ ለኢመሰል መሳሞት- እብ ተአስትህል ራክባቱ ወሕነ ፍሬ ተዕበትነ- ወግደእ ጽፍርናቱ ወምን እንሸንን ለሐብን- በዲር አስልናቱ።

ሕነ ዲብ ታሪክ እዲነ- ምን ለዓድለነ ልትፈሌ ሓቅነ ነዜዕ አለቡ- ወገርዛነ ለገሌ ኢንትህኬ ምን ንዓል- ለገበዩ ኢተ'ሌ ይእንፈርህ ምን ሰጅን- ዲብ ቤት መሕቡስ እምበሌ ኢንሐድጉ ምድርነ- ኢንትከተል ወኢንዐሌ ወይእንቀይር መብደእነ- ምን መርበይነ ይእንጀሌ።

ሕነ ምንመ እንሸንን- ዕጽፋት ብነ ዝያደት ዐስር መራር ካዩድነ- እት ጋድም ወለ ሰጋደት አወል ሕርየት አምጸኡ- ወሐሬ አስበትነ ሰያደት ወሰላም መ ደማነ- እብ ደምናቱ ተአከደት ለህንቀልቅ'ለ አለቡ- ታክያት ለእብነ ትወተደት ዐጃይብቱ ጸገምነ- ለዐለም እግሉ ተፈረጀት አንሳት ምንመ ለአወቅዩ- ናይናተ አወል ደረጀት።

እነ አለቡ ለገቢል- ኢሊሐድር ወኢሰክን ገጽን ቀደም ነኣሳድር- ዲብ ልብሉነ አክለክን ምን እስትሸሃድ ይእንፈርህ- ወገርብነ ምን መስክን እኪት ነኣገኑሐ አባይነ- ወአጨብል እንደፍን ሓድር ለህለ ነኣግዕዙ- ወሃርብ ላቱ ነህድን ክምለ መሸገ ይእንመሸግ- ወክምለ ፈርህ ይእንጀብን።

ሕነ ዲብለ ምዴሸትሙ- ኢከረዐነ መታክል ዐስር ጸባብ ነኣልፍ- ከቡድ ላቱ መሻክል ነቢር እግል ልትሐስን- ሕድት ምርኩብ ነኣትአክል ምን አለቡ ነኣትሄዱ- መካሪትነ እንቀዋቅል ሓቱ ተአሰፍ አለብነ- ለእበ አክራ'ነ እንዋቅል ምስል ከሉ እንገሚ- ጉሉል ላቱ ወዓቅል ቃዊ ገቢይ ነኣርእዩ- ወሸቅል ነሐብር እግል ዓጥል።

ደማነትነ እት ኖስተ- ለእበ እምብል ክምእና ለሞራልነ ኢልትከመህ- ሐቦ ብነ ወሕልና ኢከረዐነ መታክል- ላመ ከቡድ ምስክና ምን ልትሰበር ለዐጭም- ወምን ነቅስ ገርብና ዐስር ሕሉል እምባሰር- ሕያይ ምንገእ ለምክና ኢከረዐነ ለመልገም- ትም ምን ልብል ለአፋና ኢከረዐና ለሰብር- ናይ እዴ ወለእግርና ወኢከረዐነ ለዐወር- ምን ኑር ልትሐሬ ነዘርና።

ኢንታኬ ምን ብዕዳም- ሓቲክ ረሐ ትከፍዩ ለእቱ ሕጉዛት አለብነ- ዲብነ ምን ኢሊሐዝ'የ ሳፍየት ለእግለ እንወዴ- ወግፍሐት ለእንክርየ ጋመት ላተ ነኣትምም- ወታርፈት ነኣትዐርየ ታክያት ሸፍር ኖስናቱ- ለዐይለት ሕነ እንፈርየ ቤትነ ሰእነት ኢኮኒ- እብ አክያርነ ነኣትየ እግል አትራዛቅ ደይንብኣ- ለአማን ከሉ ደልያ።

ሕነ በርህት ሕነ- ለቤት ሓዬ ለኖራ ሕነ ረሕመት ሕነ- ለሸፍር አክለት ወጎራ ሕነ ፍቲ ሕነ- ሕፋን ላቱ ዴሪራ ሕነ ሕሸመት ሕነ- እግ'ለ ኖሱ ኢጆራ ሕነ ብዙሕ እንረፍዕ - ወሐድ ቱ እነ ለጸራ ሕን ሕነ ወመእከብ- ፈረስ ለሓሞጥ ኮራ ወዴጸት ሕነ ወመትከል- እግ'ለ ሕንከሽ ወየራ። ሳልሕ ሙሰ (ወድ ሓቢብ)

መባጺሕ

መባጺሕ በህለት ምሮ ነፈር እት ሓጨር ልግበእ መ'ረይም ወቅት እግል ለአትምሙ አው ልብጽሐ ለለሐዜ መጃል ሀለዮት ቱ። ምን እለ ለእንፍህመ ምን ተሀሌ እት ሓጨር ልግበእ መረይም ወቅት እግል ንውደዩ ለነሐዜ ሓጃት ሓቅ ሀሉ። መባጺሕ እግል ለሀሌ እግልነ ላዝም ቱ። እብ ከአፎ ሰኔት ፍገራት ለለአመጽእ መባጺሕ እንወዴ አመርት ህዩ። ክም ሸባብ ምህም ቱ።

ቀደም ክሉ ላኪን እለን ለተልዩ አስእለት ግል ንብለስ ንጀርብ

- እት ክኣኒ ምዕል። ወሬሕ አው ሰነት እለ ሓጃት እግል አግዴቱ እንዴ እንቤ ብጉሳም ነኣምር።
- እብ ከአፎ ገቢይ እትለ ተሐደደ ወቅት እትለ መባጺሕ ትበጺሕ ምስል ነፍስከ ትትፋህም ገብኢ።
- እግለ ለአፍገርካሆም በርናምጃት እት ወረቀት እንዴ ከተብከ እት ክል ምዕል ትራጅዖም ወሚ አትመምከ ወሚታርፍክ ህለ ትራቅብ።

እግል እለን እት ለዐል ለሸረሕናህን አስእለት ብለሰነ ኢኮን ሓቅ ገኡ። እት ሓያትነ ምህም ሴፈ ሓድግም ህሌ። ወክመ ሰዋግ ለአለበ ጀልበት። ለእብ ሸማል ወሞጅ በሐር ለደረከዋቡ ጀህት ትገይሱ። እንታሙ። ደለ እድገዩ ለነስአተካ'በ ገቢይ እብ ትገይሰ ህሌ። መባጺሕ ወድየት ወአፍገርት ወቅት ለኢነስእ ወለ ገኡ ነፈር እግል ልውደዩ ለቀድርቱ። መትሰባል ወመትብጋስ ሌጠ ለአትሕዜ። በርናምጃትነ እግል ልትዐወቶ ህዩ ራቴዕ መባጺሕ አፍገርት ላዝም ቱ።

ከእግል ዮም ክም ሸባብ እት ክል ለትብገስነ እቱ መጃል ንትዐወት። መባጽሕነ እለን ለተልዩ 5 ሓጃት እግል ልከምክምቱ ቡ።

- መባጽሕነ ፍንቱይ። ዋዴሕ። ወእሙር እግል ልግበእ ቡ። እግል መሰል እት ሰነት 2025 እግል እትዐወት ብዬ ለልብል ፍክር። እትሚ እግል ትትዐወቱ ተሐዜ ህሌ። እብ ከአፎ። ሚ መሻክል እግል ልሳድፋክ ቀድሮ። ኢሸፊሕ ሰበት እለ ታምም መባጺሕ ኢኮን። ሰበት እለ እት እሙር ወቅት። እሙር መባጺሕ ወእብ ከአፎ እግል ንብጽሐ ነሐዜ ህሌነ እግል ነኣክድ ብነ።
- መባጽሕነ ለልትቀይስ እግል ልግበእ ቡ። እግል መሰል መባጽሕነ ምስል ግሩሽ ለልትጸበዋ ሓቅ ገብኡ። እትለ ሰነት እለ አክል እለ ግሩሽ እግል አምጽእ ብዬ እግል ኒበል ወጀብ። አውመ ደረሳይ ሓቅ ገኡከ እትለ ትመጽእ ሰነት ምለዐል 80 ምን ምእት ንቀጥ እግል አምጽእ ብዬ እንዴ እንቤ። እሙር ወዋዴሕ መባጺሕ እግል ለሀሌ እነ ወጅብ።
- መባጽሕነ እት ዐመል እግል ልትርጀም ለቀድር እግል ግበእ ቡ። ዩምክን እት ሰሩ ምርናምጃት እዴ እግል ተሀሌ እግልከ ቀድር። ላኪን ለበርናምጅ እብ ምልኡ እት ሓንቲ መራቀብትከ ሰበት ኢገበኡ። ሕዱድ መባጺሕ እግል ተአፍግር ኢትቀድር። ሰበት እለ። ለተአፈግሩ መባጺሕ ክሉ ወቅት እግል ትትዐወት እቱ ሓቅ ገኡከ እት እዴከ ግል ልግበእ ቡ። እለ ሓቅ ኢገኡት ዩምክን ምስል ወቅት ልግበእ መመቅደረት። እት እንተ ለተሐዝዩ እቱ ወቅት እግል ልትመምም ክም ኢቀድር እት ወግም እግል ተኣቱ እብከ።
- መባጽሕነ እት አማን ወአማነት ለተንከበ ልግበእ እግል መሰል እንዴ ተምሪን ተዕሊም ኢተኣነብት እት ተመጽእ ሰነት። ለሸፍገ ሰዕያይ እት እድገዩ እግል እግበእ ቱ። ለልብል መባጺሕ እት አማን ለተንከበ ኢኮን። ለእግል እትለ ደረጀት እለ ትብጸሕ። ለህለ ረዩም ሸቅል ወወዴቅ ወቀኒጽ እት ወግም ኢኣቲካህ ህሌ። ሰበት እለ እግል ትትዐወት ኢትቀድር። ክም ሸባብ እት ክል ለትብገስነ እቱ መጃል እግል ንትዐወት ህዩ መባጽሕነ። ናይ አምን ወክሉ ተሐድያት እት ወግም ለኣተ እግል ንውደዩ ወጅብ።
- እብ ወቅት ለትቀየደ ልግበእ እግል መሰል እትየ ወቅት እግል ትብጽሐ ተሐዜ ህሌከ ወእት ክል ምዕል እግል ትውደዩ ለብከ ዋጅባት እብ ዋዴሕ ክተቡ። ሰበት እት ክል ምዕል ለትብገዩን ጦብተን እት አክር ምልኤት ዓማረት ለሸቅዩ። ከሓይሳም ሸባብ እት ክል ለትብገስነ እቱ መጃል እግል ንትዐወት። ለነኣፈግሮ መባጺሕ። እት አማን ለተንከበእብ ወቅት ለተሐደደ። እት ዐመል እግል ትተርጅሙ ለትቀድር። ፍንቱይ ወእግል ልትቀየስ ለቀድር ልግበእ።

3^ይ ወናይ ደንጎበ ክፈል

ነቅፈ ሐቆ ሕርየት፡ ለሸቱት ዐለ ሸዐ፡ ዲበ ፈትዩ ስሙይ እሻረት ስሙድ ላቱ ድጌሁ ነቅፈ ምን ሐዲስ እንዴ ሐድረ፡ ዲብ ብና ወተዕሚር መዲነቱ ትበገሰ። ለሃግግ ዐለ ኣብያቱ በኑ ወእብ ሐዲስ ሞወር ወግሩም መባኒ ሰርገያ ነቅፈ። ለወቁል ዐክለ እብ ወቁል ዐማራት ትገልበቡ፡ ምን ሐዲስ እንዴ ትከጠጡት ኣሌፍ ዲብ ዐማር ትቤ ከገጽ ቀደም ኣሳደረት። በዲር ለኢተኣምሩ፡ ሞወር ፈናድቅ፡ መካትብ፡ መዳርሱ፡ ገራጃት፡ ሰይደልያት፡ ኣፍራም፡ ከደማት ከህረበት፡ ተለፎን ወቡስጠት ረክበት። ለዲብ ወክድ እስትዕማር ምን ሐቱ መድረሰት ለሐልፍ ለይዐለ መዳርሱ፡ ዮም ምን ረውደት እንዴ ኣንብተ ኣስክለ ትወቀለት ደረጀት ለለኣደርስ ሐድ 7 መዳርስ ህለ። ላማ ምን ዐስሮታት ለሐልፎ ለይዐለው ደረሳህ፡ ዮም እብ ኣላፍ ተዐለበው። ለኣልፍ በጽሕ ለይዐለ ሰካና ዮም ዝያድ 10 ኣልፍ በጽሐ። እሊ ህዬ ነቅፈ ቀደም 48 ሰነት ለኢተኣምሩ ዮም ሐቆ 48 ሰነት ምን ተሕሪራ ለተወበቱ እሻረት ተጠውር ወዐቦት ቱ። ለምን መንገድት ነቅፈ ኣስክ ሕሊል ሕዳይ ለተኣድሮሬ ገበይ ኣቅሕማ ትመሰል ለዐለት ጨባብ ስጋደት ስጋድመ፡ እብ ክድመት ሸዐበ ወሕኩመተ ዲብ ፈይሕ፡ ኣስክ ክረዕ ሻኒኖ ባጽሐት ህሌት።



እሊ ህዬ ብሸራት ወሰእዮብ ሰኔት ናይለ ሐልፈ ዐባብ ሰካነ ለበሸር ኣዋይንቱ፡ ረቢ እት ኬር ልወስኩ።

መዋመጦርለ ንዳሉ እት ተዕሊም ኣካዳምየት ወሰያሰትመ ኢሐምቀ። ምን ፈዝዐ ወተዐለመ ህዬ ኣንሰ ወተብዐት ወጠኖም ምስል ከድመወ ወዐወተው። እሊ ክያል ለኢልትረኩብ እሉ ክፈሕ፡ እስትሸሃድ ወኤማን ህዬ፡ ቅያሰ ሐድ ለኢልትረኩብ እሉ ሕርየት ወልደ። ነቅፈ ዮም ስሜት ኣግሩሸነ ገኣት፡ ዕላመት ስሙድ እንዴ ገኣት ምን ክል

ነቅፈ፡ ዕላመት ነባሪ ክፈሕ

ኣካን ትትበጸሕ ህሌት። ዒን ዕልምመ ጋብኣት ህሌት። ለሻለቀ ማሞ ተምትሚ ዕስኩር እቱ ለዐለ መባኒ መክተብ ተዕሊም ምዴርየት እንዴ ገብእ፡ በደል ርሳስ ቀለም ተንክር ምኑ ህለ። ለሐቱ በነ እት ሰነት 1960 ለትፈተሐት መድረሰት ማሞ ትትበህል ለነብረት ናይ ዮም መድረሰት ሹህደ፡ ኣስክ ሳድሳይ ፈሰል ሌጣተ ተኣደርስ ለዐለት። ወክሉ ረክበ ኢነብረ። ደረሳህ ምን 200 በዝሐ የዐለው። እት ምግባይት ደረጀት ለልሓልፍ እምትሓን ዲብ ከረን እንዴ ገይሶ ወድዉ ዐለው። ዮም ላኪን 5 ረውደት፡ 5 መኣንብታይት፡ 2 ምግባይት ወሐቱ ካልኣይት ደረጀት፡ ክምሰልሁመ ሐቱ መድረሰት ቱክኒክ ህለየ ዲብለ መዲነት ሌጠ። እብ ዓመት እት ምዴርየት ነቅፈ ህዬ ዝያድ 100 መኣሰሳት ተዕሊም ህለየ። ደረሳመ ሐድ 10 ኣልፍ በጽሐ እት ህለው፡ ለእት ዐረዮት፡ ምህር ዐባዩ ወድራሰት ኣምሱይ ዶል ልትወሰኮ እቱ ቅሩብ 12 ኣልፍ ገብእ። ሐቆ ሳወ ምን ክለ ኤረትርየ እግል ተዕሊም ለትትወረድ መዲነት ነቅፈተ ምን እንብልመ ኣትራሳቅ ኢኮን። ኣቤኮ ይእበዴ ለቤለ ክም ነብር ነቅፈ ሰመዕ በሰር ተ። ስሙድ ሸዐብ ወሙናድሊን ኣክራን ረሳስ ዲብ ኣክራን ኣናሺድ ወፈረሕ፡ ጼነ ባሮት ዲብ ቅዱይ ጼነ ሸፍር ወዕንባባታት በደለ።

ነ ቅ ፋ
ቀንጻ ዋርሳይ ይከኣሎ -
ለኣርደት እግል ትትዐመር
ምን ጋሽ ቀንጻ ወበርከ - ምን
ኣለመራ ወስምህር
ሳሕል ኣስክ ኣዋክራ - እብ
ቅርራ እግል ንፍገር፡

ነቅፋ ኣተው እም ብሩድ -
መስከብ ስሙድቱ ወሐጠር
ነቅፋ ምድር ተሐዲታ -
ህቱቱ ለእቡ ትትኣመር
ነቅፋ እም ብሩድ - ሐላወወ
ክም ገፍተር
ወነቅፋ እም ብሩድ - ሉል

ገብኣት ጀውሀር፡
ነቅፋ እለ ተኣሰታህል -
ወኣዜማ ብዝሓት ትጠበር፡
ኣማነታ ኢትከይን - በዲር
ሐቆ ትትሐረር

ነቅፋ እም ብሩድ - ነቅፋ
ለዋይደት ኣቅረት
ነቅፋ መንዝል ስሙድታ -
መስከብ ሺመት ተ ወዕለት
ነቅፋ ዐይኪ - ኣፍገረው ዲብ
ጽልመት


ፈግራ ምንኪ መንግስቱ -
እንዴ ጃምም ክም ሕርመት
ወኣዜ ተዐሰ ወያኔ - ከሰድር
ሐዘ ወኣመት
ወላድ በዋሮ ጸንሐው -
ወካረው እት ሀመት
ደረጃ ሐሰብ ኣብጸሐው -
ወጃረበ እግል ሰዕመት

ሸባብ ሰኒ ወዴኩም - እንዴ
ሸፍኩም ልትነሰር
እትሰተራ ኣክባርኩም - ክቱብ
ህለ ዲብ ገፍተር
ወክቱብ ህለ ዲብ ኣርድ -
ወክቱብ ህለ ዲብ ዐሰተር
ክቱብ ህለ ዲብ ድወል -
ዓለም እቡ ትትፈክር
ወርሕ ዲባ ዐሰተሩ - እብ
ረሐት ከፎ ልትሰተር
ዓቤ ወርሕ ዲባ ዐሰተሩ -
እብ ረሐት ከፎ ልትሰተር

ነቅፋ እም ብሩድ - ንሰኣ
ምና ለዕበር
ነቅፋ ዔጻት ሰውረትታ -
ታሪክ ምንዲ ንደክር
ነቅፋ ወላድ ሸቀዋ - ክሎም
ምስል እብ ሕበር
እግል ልሸንን ስጋዳ - ወሸዐበ
ሰኒ እግል ልንበር

እለ ሐሰት ኢኮኒ - ግንሐ እለ
መሐደር
ቃዊ እግል ልትዐለም -
ቀሺም እግል ልትሐበር
ኣተንሱኒ ወሻባብ እግል -
እንሰሐኩም እብ ሕበር
ክልና እንዴ ትከምከምና -
ንኡቱ እሊ መደበር
ዲቡ እንዴ ተዐለምና - ዲማ
ሰኒ እግል ንንበር
ሐቱ ተርፈት ኣለብና - ኣስክ
ገለም ወገፍተር
መደበር ነቅፋ ለኢለኡቱ -
ምን መስኡሉ ልደለም
መደበርና ሰዒድቱ - ለሰብኡ
ፈግራ እብ ሰላም
ወክሉ ዲቡ ደረሰናሁ - ኣደብ
ወለእሕትራም

ነቅፋ ሸምብሬበት ዐለት -
ወለት ማሌ
ወዮም ዓግር ገብኣት -



ነቅፈ ማሌ ወዮም

ተኣድረዋሬ
ኣዋልድ ፋግራት እለ - እግል
ሕዳሌ
ሸባብ እግል ዓፊሃ - እግል
ትባሬ

ወላድ መዋኣው ምን በርከ -
ነቅፋ እግል ዐማራ
ኣደሐ በልሰዋ - ጋብኣት
ህሌት ብጣረ

መርሐባባ ነቅፋ - ፈጅር
ፈጅር
ዲብ ምን እወስፋ - ወምን
ትመሰል
ክም ጢላን ኢበለ - ወክም
ምስር
ወክም ክዌት ኢበለ -
ሕብርሕብር
ብትሮል ህለ ዲባ - ምንዲ
ፈግር
ደሀብ ህለ ዲባ - እብ ክል
እንክር
ፈድልለ ሸባብ - በልሰት
ሕብር
ላሊ ኣደሐ ገኣት - ክምሰል
ኣምዕል
ጀዋ ባርህ ገብኣ - ጽብሕ
ምድር
ዲብኪ ለትወለደ - ሊዴ ሸክር

ነቅፋ ኣይሰ ሕሹምታ -
ለሹም ሸንን ረኣሰ መንበር
ወኣድብር ክማ መሐበር -
ክሉ ዲብ ልትከለል
ህታ ትበልሰ ምብላሰ -
ወኣድብር እግል ልጸበር
ገርጀቦ እብ ጀህት ወግሬታ -
ግሲት ህሌት እብ ጀፈር
ፈለክ ባብ መንደብቱ - ሮራ
እቡ ልትፈገር
ወግሬት ምና ወራራት -
ሳትር ዐለት ወመሕደር
ድፋዕ ገብኣት እግልና -
ለፋሉል እንዴ ልትወገር

ክልኤ ኣንጣይ መኮቲት -
ንዋይ እግለን ልሸፈል
ጨዕሙር ፍንጌ ክለንቱ -
ለዐድና ዲቡ ልትከለል
እምባልቆ ለማያ - ዋዑምቱ
ክም ሰከር
ምለዐል ምድር ተንክር ጸነሐክ


- ግለል ኢኮን ወሕፈር
ምን ሰከት ሻነት ሐዋታ -
ሳዐት ወሰር ትትፈገር
ዶል ለመጽእ ጣኢራት -
ሚምጠዕ ምነ ልትወገር

ጠብረ ዐለት መዳርስ - ዕልም
ምነ ልትፈረር
ወኣማክን ኣሮ ዕያዳትቱ -
ኣዳም ዳዋ እብ ሕበር
ወማክን ኣሮት መርመራቱ -
ለኣምራድ እግል ልትኣመር
ኣማክን ኣሮ ናይ ዕንታትቱ -
ደለ ያራ ምን ጀፈር
ኣማክን ኣሮ ናይ ኣይናብቱ -
ኣልሓይ ዲቡ ልትነቀል
ኣማክን ኣሮት ዐመልያትቱ -
ኣክቡድ ዲቡ ልትሰጠር
ፍንጌ ጅንዲ ወሸዕቢ - ፈንቱ
ኢኮን ወክፈል
እብ ሐቱ ዕንቱ ትትገኣሕ -
ሐቆ ትመጽእ እብ ሕበር
ጠብረ እሊ ጠገመ - ዐደድ
ሰኣና ወመብጠር

መጢጤ ደብር ዐቢተ - ንዋይ
እግሉ ልትሸፈል
ኣ ወኣጣል ወግጊዕ - ክለ
ትነብር እብ ሕበር
ኣማክን ኣሮ ሕደዕቱ -
ኢልትኣቱ ምን ጀፈር
ኢረኤኩም እብ ዕንቹ -
ሰዐኩው እብ ከበር።

ጠባዋ ዐለ እምዳድና -
ለሰለሕ ምኑ ልትፈረር
ኣበሎ ዐለት ገራጅና - ዐረባት
ደለ ትትዐጠል
ጠባይት ምልክትታ - ሐብሬ
ድፍዓት ምን ጀፈር
ድግድግ መካሪት መዳፍዕቱ -
ሰለሕ ደለ ትትወገር
ወእሊ ድግድግ ናይ ዮም -
ዕፌ ገብኣ ወጀህል
ኣማክን ኣሮ መጣራትቱ -
ዋያራት ካሬ እብ ሕበር
ወኣማክን ኣሮ መዳርሰቱ -
ተጠውራት ምን ጀፈር

መርሐም ኣድም መሐመድ
ኣልሓጅ



ደዋር ካስ አቅኪም ምግብ ተመ

ተክሚናት ወደንደን ካስ ነስአው

ደዋር ካስ ኩረት እግር አቅሊም ምግብ ሰንበት ዲብ ስታድዩም አስመረ ናይ ካቲመ ትልህታት ዲብ ለጉብኡ ተክሚናት እብ አዋልድ አንሳት ወደንደን እብ ውላድ ካስ ነስአው።

እቲ እግል አወል መረት ለጉብኡ ናይ አዋልድ አንሳት ጅግረ ለበዝሐ ወክድ ዲብ ደንገበ ለልትራክቦ ደንደን ወተክሚናት ዲብ ናይ ካቲመ ትልህታት ትራክብው። ደንደን ለሐልፈ ወሬሕ እቲ ለወደዩ ናይ ናዲ ወጠንያይ ትልህታት እግል ተክሚናት እንዴ ቀልበ ካስ ናስእ ክም ዐለ ልትፈቀድ።

ማሌ ለሀ ላኪን፡ ተክሚናት እብ ድግማን እብ ቀላል ለልትቀለብ ኢዐሉ፡ ወለ ትልህታት ዐእብዐ ምንመ 'ተምም፡ እብ ሪገሌ ላኪን ተክሚናት 4ኡብ2 ተዐውተ ወእብ ደንደን ሌጠ ጽቡጥ ለጸንሐ ጅግረ ዲብ፡ አካኑ አክደ። ነፈር ተክሚናት

ሲሞን ሳሙኤል ህዩ ናይለ ትልህታት ለሐሰ መተልህያይ ትበህለ።

ዐባዩ ፍረቅ ውላድ ናይ አቅሊም ምግብ ደንደን ወበሐር ቀየሕ ሐቀህን ተልሀው። እለ እህትማም ዛይድ ለተህባበት ትልህታት ለሐልፈ ትልህታትም ለሐሰት ዐለት። እሎም ፍረቅ እሎም ቀደሙ ለወደው ብዙሕ ትልህታት እብ ትሉሉይ ዐገብ ለጉብኡ እቲ እብ ሰበቡ ህዩ ትልህታት አክለ ጸንሐ ለበጥር እቲ ከምሰልሀው ሕዲን ጎላት ወለ ኢትሰሕብ ሐረካት እት ለርኡ መትፈርጀቱ ለለአመሽግ ዐለ። ማሌ ለሀ ላኪን ለልትሐመድ ሐረካት አርአው።

ደንደን እቲ ዶሉ ዲብ ካልኣይት ደቂቀት እግለ ለረክበዩ



ደርበት ጀዛእ ሲም መድሕን ኩረት ምን ለዐል ቦርቴሬ እንዴ ሓለፈ ማርሒቱ ለአስበተት ጎል ሰጀለ። ዲብ 20 ደቂቀት ህዩ ቦርቴሬ በሐር ቀየሕ እበ ወደዩ ከጣእ፡ እብ መተልህያይ ደንደን ሚሮን አለም እንዴ ትዳገሽት ዶር ማርሒት ደንደን ለዐቢት ጎል ትሰጀለት ወመተልህያት በሐር ቀየሕ መዕነውየት ለደህረት ዐለት። ሲም ተኪኤ ለኢትዐውታብ ፍርሰት መ ነቲጀት ሰኒ ወአማን ለትርሕብ ወገብአት ዐለት።

ዝያድ ትልህታት እግል ልራቅብ ልጅህድ ለዐለ ፈሪቅ በሐር ቀየሕ ዲብ አወላይ ትልህታት በለስ እንዴ ኢልህይብ ትልህታት ተመት። ሐቀ ዕርፍ ላኪን ዲብ 60 ደቂቀ እግለ ረክበዩ ደርበት ጀዛእ እብ ቤንሁር

እስቲፋኖስ ጎል ትሰጀለ ወትልህታት ዲብ መሳልሒ እግል ልበድል ትበገሰ። ዲብ ለተርፈ ደቃይቅ ላኪን እግል ለአድምዕ እብ ኢቅድረቱ ደንደን እብ ጸቢብ 2ኡብ1 ተዕውተ። እግል ሱፐር ድሺዥን 'ኤ' እግል በሐር ቀየሕ እብ ሰቡዕ ንቅጠት እንዴ ሐልፈ እብ ካምል 30 ኑቅጠት ለሄርር ለህለ ፈሪቅ ደንደን እብ ናይ አዋልድ ለክሰረዩ እብ ውላድ መትዐጥቱ ናይ እለ ሰነት እለ ሰልፋይ ካስ ረፍዐ። ወሚሮን አለም ናይለ ትልህታት ሓይስ መተልህያይ ትሰመ።

እብ አሳስ እለ ደንደን (ናይ አዋልድ) ወበሐር ቀየሕ ፍደት ልትሰርገው እት ህለው ተክሚናት ወደንደን (ውላድ) ደሃብ መዳልዩአት ወዐቢ ካስ ነስአው።

ጅግረርያደት መዳርሰ አቅሊም ምግብ እቲላለ

ጅግረርያደት መዳርሰ አቅሊም ምግብ ሰንበት እብ ለትፈናተ ወራታት አተላለ። እብ አሳስ እለ ዲብ ሰር ትልህታት ኩረት እግር ዕምር 17 ወምን ለዐሉ አዋልድ አንሳት በሐር ቀየሕ እግል ሐላይ፡ ሐርነት እግል በርከ ሕድ እበ ሽብህ 2ኡብዐ ቀልበያህ። ዲብ እለ ዕምር ምን ውላድ ህዩ ሐርነት እግል አስመረ ዕሙማይ 6ኡብ4 እብ ኢሪጎሌ፡ በሐር ቀየሕ ህዩ እግል ሐላይ 1ኡብዐ ቀልበው።

እት ጅግረ ሾሊባል አዋልድ አንሳት ሐርነት እግል በርከ 3ኡብዐ ኢሳቕ ተወልዴመድህን እግል ማይነፍሒ 3ኡብ2 ቀልባህን እት

ህለዩ እብ ውላድ ደምቤ ሰምበል እግል ኢሳቕ ተወልዴ መድህን 3ኡብዐ በርከ እግል ርእሲ ዐዲ 3ኡብ2 ቀልበው።

እምበል እለ ዲብ ባኬትቦል አዋልድ አንሳት ሰማእታት እግል ልምዓት 34ኡብ22፡ በርከ እግል ደምቤ ሰምበል 32ኡብ20 ቀልበዩ። ዲብ ናይ ውላድ ህዩ በርከ እግል በሐር ቀየሕ 59ኡብ49 ሰማእታት እግል እምበሃረ 77ኡብ39 ቀልበው።

እብሊ ህዩ ዲብ ኩረት እግር አዋልድ አንሳት ሐላይ ምስል በርከ እግል ደረጀት፡ በሐር ቀየሕ ምስል ሐርነት እግል ካስ እግል ልተልህያቱ። እብ ውላድ፡ አስመረ ሐፈሻዊ ምስል ሐላይ እግል ደረጀት፡ ሐርነት ምስል በሐር ቀየሕ ዲብ ካቲመ እግል ልተልሀውቱ።

ሾሊባል አዋልድ አንሳት፡ በርከ ምስል ማይ ነፍሒ ዲብ ናይ ደረጀት ትልህታት ሐርነት ምስል ኢሳቕ ተ ወ ል ዴ መ ድ ህ ን



እት ካቲመ፡ እብ ውላድ፡ ኢሳቕ ተወልዴመድህን ምስል ርእሲ ዐዲ ዲብ ናይ ደረጀት፡ ደንቤ ሰምበል ምስል በርከ ዲብ ናይ ካቲመ ትልህታት እግል ልትራክቦቱ

እምበል እለ ዲብ ባኬትቦል አዋልድ አንሳት ልምዓት ምስል ደምቤ ሰምበል እግል ደረጀት፡ ሰማእታት ምስል በርከ እግል ካስ። እብ ውላድ ህዩ በሐር ቀየሕ ምስል እምበሃረ እግል ደረጀት ሰማእታት ምስል በርከ እግል ካስ እግል ልተልሀውቱ።

መጥመጦር እለ ጅግረ ኩረት እዴ (hand ball) ጋብእ ዐለ። ዲብ ናይ አዋልድ አንሳት ሐላይ እግል ሰማእታት 3ኡብ2፡ አስመረ ሐፈሻዊ እግል ደንደን 5ኡብዐ፡ በሐር ቀየሕ እግል አዲያእ 3ኡብ1 ቀልባህን እት ህለዩ፡ እብ ናይ ውላድ ህዩ ደምቤ ሰምበል እግል ደንደን 8ኡብ4፡ እምበሃረ እግል ጸዕደ ክርስትያን 15ኡብ5 በሐር ቀየሕ እግል ልምዓት ህዩ 4ኡብ4 ክም ትፈናተው ምን ፈረዕ ውዛረት ተዕሊም አቅሊም ምግብ ለረክብናህ ሐብሬ ትአፍህም።

ዐሰብ ወጠንያይ ጅግረ ኩረት እግር

ግንራራብ በሐር አስተብደ

“ዐሰብ-ይ” ለትብል ስሜት ለትህባበቱ አወላይ ጅግረ ኩረት ግንራራብ በሐር “ግንራራብ በሐርን እግል ዐቦት ኩረት እግር ወጠን” እበ ለትብል ስቅራት ሰንበት 9 ማርሰ ዲብ ሳያታት ሐቀ አዝህር እት ግንራራብ በሐር ዐሰብ አስተብደ።

እቲ ናይ መክሰቲ አምዕል ጅግረ ኩረት እግር ግንራራብ በሐር ዮም ዓመት ዲብ ካላንደር ናይ ሰዕ ድወል ኮንፈደሬሽን ኩረት እግር ምግባይ ወምፍጋር ጸሓይ አፍሪቀ ኣቲ ክም ህለ ተሐበረ። ዲብ እለ ሰልፋይ ወጠንያይ ጅግረ ህዩ ሰለስ አቅሊም በህለት፡ ግብለት በሐር ቀየሕ፡ ቅብለት በሐር ቀየሕ ወግብለት ሻርቲ ህለው። ዲብ አምዕል እት ፍንጌ መትኩብታይ አቅሊም ግብለት በሐር ቀየሕ ወቅብለት በሐር ቀየሕ ትልህታት ገብኡ። ቅብለት በሐር ቀየሕ ህዩ 9ኡብ4 ተዕውተ።

እብ ሐም-ሐምስ መተልህያት እብ ሓፊ/እምበል አስእን ለጉብኡ ጅግረ ዲብ ሰለስ መራሕል ለልትክፋራል 36 ደቂቀት (ሰለስ ወክድ 12 ደቂቀት) ናይ ትልህታት ወክድ ለሓልፎ።

ወጠንያይ ጅግረ ኩረት ግንራራብ በሐር ቀየሕ “ዐሰብ-ይ” አስክ 18 ማርሰ እግል ለአተላሌ ክምቱ ለበጽሐተን ሐብሬ ተአክድ።





“ሕርየት አዋልድ አንሳት እግል ዐማር”



ዲዛይን - ታላዛዝ አብርሃ

ስወር - ታላዛዝ አብርሃ
አክሊሉ ዘርአዝጊ
ሳልሕ ዓብደልቃድር
ክብርም ጸሃዩ
አብርሃም ብዩነ